

慧日佛學班第 11 期／福嚴推廣教育班第 22 期

《大智度論》卷 71

〈釋大事起品第五十¹〉²
(大正 25, 552c18-555b9)

釋厚觀 (2011.11.05)

【經】

壹、般若依五事說甚深

(壹) 須菩提重說般若為五事故起

爾時，須菩提白佛言：「世尊！是深般若波羅蜜為大事故起、不可思議事故起、不可稱事 (553a) 故起、無有量事故起。世尊！是深般若波羅蜜無等等事故起。」³

(貳) 佛述成並釋理

一、佛述成

佛告須菩提：「如是！如是！是深般若波羅蜜為大事故起，乃至無等等事故起。」

二、釋理：般若能含受五度乃至佛德

(一) 以含受義述成五事

1、正明

何以故？般若波羅蜜中含受五波羅蜜，般若波羅蜜中含受內空乃至無法有法空，含受四念處乃至八聖道分，是深般若波羅蜜中含受佛十力乃至一切種智。⁴

2、舉喻明理

譬如灌頂王，國土中尊，諸有官事皆委大臣，國王安樂無事；如是，須菩提！所有聲聞辟支佛法、若菩薩法、若佛法，一切皆在般若波羅蜜中，⁵般若波羅蜜能成辦其事。

以是故，須菩提！般若波羅蜜為大事故起，乃至無等等事故起。⁶

¹ (大事……十) 七字 = (釋成辦品第五十 (訖第五十三品)) 十三字【宋】，= (成辦品第五十 (訖第五十三品)) 十二字【元】，= (成辦品第五十 (經作大事起成辦品)) 十四字【明】，= (釋第五十品，訖第五十三品，成辦品) 十四字【宮】，= (摩訶般若波羅蜜品第四十九 51 大事興品) 十六字【聖】。(大正 25, 552d, n.22)

² (大智……一) 十六字 = (摩訶般若波羅蜜品第四十九大事品七十一 (譬喻品善知識教發心品)) 十八字【石】。(大正 25, 552d, n.21)

³ 「五事」的說明，詳見《大智度論》卷 70 〈49 問相品〉(大正 25, 551c28-552b16)。

⁴ (1) 般若名大：含受故大。(印順法師，《大智度論筆記》[E018] p.316)

(2) 《大般若波羅蜜多經》卷 444 〈48 成辦品〉：「何以故？善現！甚深般若波羅蜜多，能成辦布施波羅蜜多，亦能成辦淨戒、安忍、精進、靜慮、般若波羅蜜多；……亦能成辦諸佛無上正等菩提；能成辦一切智，亦能成辦道相智、一切相智。」(大正 7, 237b13-c8)

⁵ 般若：二乘、菩薩、佛法在般若中。(印順法師，《大智度論筆記》[E002] p.288)

⁶ 《大般若波羅蜜多經》卷 444 〈48 成辦品〉：「善現！如剎帝利灌頂大王，威德自在降伏一切，以諸國事付囑大臣，端拱無為，安隱快樂。如來亦爾，為大法王，威德自在降伏一切，以聲聞法、若獨覺法、若菩薩法、若諸佛法，皆悉付囑甚深般若波羅蜜多，由此般若波羅蜜多，皆能成辦一切事業。是故，善現！甚深般若波羅蜜多，為大事故出現世間，乃至為無等等事故出現世間。」(大正 7, 237c8-15)

（二）舉不取不著諸法釋舍受義

1、佛正明：般若於諸法不取不著故得以成辦

復次，須菩提！是般若波羅蜜不取色、不著色故能成辦，受、想、行、識不取、不著故能成辦；⁷乃至一切種智不取、不著故能成辦；須陀洹果乃至阿羅漢果、辟支佛道乃至阿耨多羅三藐三菩提不取、不著故能成辦。」

2、須菩提問

須菩提白佛言：「云何色不取、不著故般若波羅蜜能成辦？云何受、想、行、識乃至阿耨多羅三藐三菩提不取、不著故般若波羅蜜能成辦？」

3、佛反問答

佛告須菩提：「於汝意云何？頗見是色可取、可著不？」

須菩提言：「不也！世尊！」

「須菩提！於汝意云何？頗見受、想、行、識乃至阿耨多羅三藐三菩提可取、可著不？」

須菩提言：「不也！世尊！」

4、佛結成

佛言：「善哉！善哉！須菩提！我亦不見是色可取、可著，不見故不取，不取故不著；我亦不見受、想、行、識乃至阿耨多羅三藐三菩提及一切種智可取、可著，不見故不取，不取故不著；須菩提！我亦不見佛法、如來法、自然人法、一切智人法（553b）可取、可著，不見故不取，不取故不著。⁸

以是故，須菩提！諸菩薩摩訶薩，色亦不應取、亦不應著，受、想、行、識乃至佛法、如來法、自然人法、一切智人法⁹亦不應取、亦不應著。」

三、歎般若及行般若人

（一）諸天歎

1、歎般若甚深

爾時，欲、色界諸天子白佛言：「世尊！是般若波羅蜜，甚深、難見、難解、不可思惟比類知；微妙、善巧、智慧、寂滅者可知。」

2、明信解因緣

能信是般若波羅蜜者，當知是菩薩⁽¹⁾多供養諸佛、⁽²⁾多種善根、⁽³⁾與善知識相隨，能信解深般若波羅蜜。¹⁰

⁷ 《大般若波羅蜜多經》卷 444〈48 成辦品〉：「復次，善現！甚深般若波羅蜜多，於色無取無執故出現世間，能成辦事；於受、想、行、識無取無執故出現世間，能成辦事。」（大正 7，237c16-18）

⁸ 不見故不取，不取故不著。（印順法師，《大智度論筆記》〔E021〕p.319）

⁹ 此四法的解釋，參見《大智度論》卷 70〈49 問相品〉（大正 25，552b6-13）。

¹⁰ 《大般若波羅蜜多經》卷 444〈48 成辦品〉：

爾時，欲色界諸天眾俱白佛言：「世尊！如是般若波羅蜜多最為甚深、難見、難覺、不可尋思、超尋思境、寂靜、微妙、審諦、沈密，極聰慧者乃能了知。若諸有情能深信解如是般若波羅

3、菩薩行深般若超勝二乘

世尊！若三千大千世界中所有眾生皆作信行、法行人、八人、得須陀洹、斯陀含、阿那含、阿羅漢、辟支佛——若智、若斷，不如是菩薩一日行深般若波羅蜜，忍、欲、思惟、籌量。何以故？是信行、法行人、八人、須陀洹、斯陀含、阿那含、阿羅漢、辟支佛——若智、若斷，即是菩薩摩訶薩無生法忍。」¹¹

(二) 佛述歎**1、重述成**

佛告欲、色界諸天子：「如是！如是！諸天子！若信行、法行人、八人、須陀洹乃至阿羅漢、辟支佛，即是菩薩摩訶薩無生法忍。

2、聞持乃至正憶念般若者勝求二乘行者

諸天子！若善男子、善女人聞是深般若波羅蜜，書、持受¹²、讀、誦、說、正憶念，是善男子、善女人疾得涅槃，勝求聲聞、辟支佛乘善男子、善女人遠離深般若波羅蜜行餘經，若一劫、若減一劫。

何以故？是深般若波羅蜜中廣說上妙法，是信行、法行人、八人、須陀洹、斯陀含、阿那含、阿羅漢、辟支佛所應學；菩薩摩訶薩亦所應學，學已得阿耨多羅三藐三菩提。」¹³

蜜多，當知彼曾供養過去無量諸佛，於諸佛所發弘誓願，多種善根，事多善友，已為無量善友攝受，乃能信解如是般若波羅蜜多。若有得聞如是般若波羅蜜多深生信解，當知彼類即是菩薩，定得無上正等菩提。」(大正 7，238c19-27)

- ¹¹ (1) 《大般若波羅蜜多經》卷 444〈48 成辦品〉：「世尊！假使三千大千世界諸有情類，一切皆成隨信行、隨法行、第八、預流、一來、不還、阿羅漢、獨覺，彼所成就若智若斷，不如有人一日於此甚深般若波羅蜜多忍樂思惟，稱量觀察。是人於此甚深般若波羅蜜多所成就忍，勝彼智斷無量無邊。何以故？諸隨信行若智若斷，乃至獨覺若智若斷，皆是已得無生法忍諸菩薩摩訶薩忍少分故。」(大正 7，238c27-239a6)
- (2) 小智小斷是菩薩無生忍。(印順法師，《大智度論筆記》[E014] p.310)
- (3) 關於二乘智斷為菩薩無生法忍，另可參見《摩訶般若波羅蜜經》卷 2 (大正 8，226a28-29)〔《大智度論》卷 39〈4 往生品〉(大正 25，343b17-19)〕，《大智度論》卷 39〈4 往生品〉(大正 25，343b25-c1)；《摩訶般若波羅蜜經》卷 22 (大正 8，381b23-26)〔《大智度論》卷 86〈74 遍學品〉(大正 25，659c5-8)〕，《大智度論》卷 86〈74 遍學品〉(大正 25，662b16-c4)；《摩訶般若波羅蜜經》卷 23 (大正 8，390c23-391a6)〔《大智度論》卷 88〈77 六喻品〉(大正 25，676a11-22)〕。

¹² 持受=受持【宋】【元】【明】【聖】。(大正 25，553d，n.5)

- ¹³ (1) 《大般若波羅蜜多經》卷 444〈48 成辦品〉：
爾時，佛告諸天眾言：「善哉！善哉！如汝所說。諸隨信行、若隨法行、第八、預流、一來、不還、阿羅漢、獨覺所有智斷，皆是已得無生法忍諸菩薩摩訶薩忍之少分。天眾當知！若善男子、善女人等，暫聽如是甚深般若波羅蜜多，聞已信解、書寫、受持、讀誦、修習、思惟、演說，是善男子、善女人等速出生死，證得涅槃，成就如來正等覺智，勝求二乘諸善男子、善女人等遠離般若波羅蜜多，學餘經典，若經一劫，若一劫餘。所以者何？於此般若波羅蜜多甚深經中，廣說一切微妙勝法，諸隨信行、若隨法行、第八、預流、一來、不還、阿羅漢、獨覺、菩薩摩訶薩皆應於此精勤修學，隨所願求，皆速究竟所作事業；一切如來、應、正等覺皆依此學，已證、正證、當證無上正等菩提。」(大正 7，239a7-21)
- (2) 三乘同學般若。(印順法師，《大智度論筆記》[E011] p.305)

（三）諸天結歎而歸

是時欲、色界諸天子俱發聲言：「世尊！是深般若波羅蜜名摩訶波羅蜜，世尊！是般若波羅蜜名不可思議、不可稱、無有量、無等等波羅蜜。信行、法行人、八人學是深般若（553c）波羅蜜，得成就；須陀洹、斯陀含、阿那含、阿羅漢、辟支佛學是深般若波羅蜜，得成；菩薩摩訶薩是深般若波羅蜜中學，得阿耨多羅三藐三菩提。是深般若波羅蜜亦不增、亦不減。」

是時諸欲、色界天子頂禮佛足，遶佛而去；去是不遠，忽然不現，各還本處。¹⁴

貳、明信解般若者之來處與得失

（壹）明信解般若者之來處

一、須菩提問

須菩提白佛言：「世尊！若菩薩摩訶薩聞是深般若波羅蜜即時信解者，從何處終來生是間？」

二、佛答

（一）上根者〔聞、解、能行〕：三處來生人間

1、從人道來

佛告須菩提：「若菩薩摩訶薩聞是深般若波羅蜜即時信解，不沒、不却¹⁵、不難、不疑、不悔，歡喜樂聽，聽已憶念，終不遠離是深般若波羅蜜，若行、若住、若坐、若臥，終不廢忘，常隨法師——譬如新生犢子不離其母；菩薩摩訶薩亦如是，為聞深般若波羅蜜故，終不遠離法師，乃至得是深般若波羅蜜，口誦、心解，正見通達。須菩提！當知是菩薩從人道中終還生是間人中。¹⁶

¹⁴（1）《放光般若經》卷 11〈51 大事興品〉：

於是諸色天子、諸欲天子同時歎言：「世尊！是摩訶般若波羅蜜不可思議，於是中出信樂，使諸聲聞各得所應，成須陀洹、斯陀含、阿那含、阿羅漢、辟支佛道；又使諸菩薩摩訶薩得成阿耨多羅三耶三菩提三佛。是深般若波羅蜜亦不增、亦不減。」

諸色天子、諸欲天子各以頭面著地為佛作禮，遶佛三匝已去；去是不遠，忽然不現，各還天上。（大正 8，79c2-10）

（2）《大般若波羅蜜多經》卷 444〈48 成辦品〉：

時，諸天眾俱發聲言：「如是般若波羅蜜多是大波羅蜜多，是不可思議波羅蜜多，是不可稱量波羅蜜多，是無數量波羅蜜多，是無等等波羅蜜多。世尊！諸隨信行、若隨法行、第八、預流、一來、不還、阿羅漢、獨覺皆於如是甚深般若波羅蜜多精勤修學，速出生死，證無餘依般涅槃界。一切菩薩摩訶薩眾皆於如是甚深般若波羅蜜多精勤修學，速證無上正等菩提，入無餘依般涅槃界。世尊！雖諸聲聞、獨覺、菩薩皆依如是甚深般若波羅蜜多精勤修學，各得究竟所作事業，而是般若波羅蜜多無增無減。」

爾時，欲界、色界天眾說是語已歡喜踊躍，於此般若波羅蜜多深生信樂，頂禮佛足，右遶三匝，辭佛還宮；去會未遠，俱時不現。（大正 7，239a21-b6）

¹⁵ 却=怯【宋】【元】【明】【聖】【石】。（大正 25，553d，n.9）

¹⁶ 《大般若波羅蜜多經》卷 444〈48 成辦品〉：

佛告善現：「若菩薩摩訶薩聞說如是甚深般若波羅蜜多深生信解，書寫、受持、讀誦、修習、如理思惟、供養恭敬、尊重讚歎，常隨法師諮問義趣，若行、若立、若坐、若臥無時暫捨，如新生犢不離其母，乃至未得甚深般若波羅蜜多所有義趣，究竟通利，能為他說，終不捨離如是般若波羅蜜多甚深經典及說法師。善現當知！是菩薩摩訶薩從人中沒來生此間。」（大正 7，239b10-18）

何以故？是求佛道者前世時聞深般若波羅蜜，書、持¹⁷、恭敬、尊重、讚歎、華香乃至幡蓋供養。以是因緣故，人中命終還生人中，聞是深般若波羅蜜，即時信解。」

2、從他方國土來

須菩提白佛言：「世尊！頗有菩薩摩訶薩如是功德成就，他方世界供養諸佛，於彼命終，來生是間，聞深般若波羅蜜，即時信解，書、持、讀、誦、正憶念——有是者不？」

佛言：「有！菩薩如是功德成就，他方世界供養諸佛，於彼命終，來生是間，聞是深般若波羅蜜，即時信解，書、持、讀、誦、說、正憶念。

何以故？是菩薩摩訶薩從他方諸佛所聞是深般若波羅蜜，信解、書、持、讀、誦、說、正憶念，於彼間終，來生此間，當知是人先世功德成就。(554a)

3、從彌勒菩薩處來

復次，須菩提！有菩薩從彌勒菩薩摩訶薩聞是深般若波羅蜜，以是善根因緣故，來生此間。

(二) 下根者〔雖聞而不問義，故多疑悔〕：人中來

須菩提！復有菩薩摩訶薩前世時雖聞深般若波羅蜜，不問中事；來生人中，聞是深般若波羅蜜，心有疑悔，難悟。須菩提！如是菩薩，當知先世雖聞是深般若波羅蜜，不問故，今續生疑悔，難悟。

須菩提！若菩薩先世雖聞禪波羅蜜，不問中事；今世聞般若波羅蜜時，不問故，續生疑悔。

須菩提！若菩薩先世雖聞毘梨耶波羅蜜，不問中事；今世聞般若波羅蜜，不問故，續復疑悔。

須菩提！若菩薩先世聞¹⁸鼻提波羅蜜，不問中事；今世聞般若波羅蜜，不問故，續復疑悔。

須菩提！若菩薩先世雖聞尸羅波羅蜜，不問中事；今世聞般若波羅蜜，不問故，續復疑悔。

須菩提！若菩薩先世雖聞檀波羅蜜，不問中事；今世聞般若波羅蜜，不問故，續復疑悔。

復次，須菩提！菩薩摩訶薩先世雖聞內空、外空、內外空乃至無法有法空，不問中事；來生人中，聞是深般若波羅蜜，不問故，續復疑悔，難悟。

復次，須菩提！菩薩摩訶薩先世雖聞四念處乃至八聖道分、四禪、四無量心、四無色定、五神通、佛十力乃至一切種智，不問中事；來生人中，聞是深般若波羅蜜，不問故，續復疑悔，難悟。

¹⁷ 持=受【宋】【元】【明】【宮】【聖】【石】。(大正 25, 553d, n.12)

¹⁸ (雖)+聞【宋】【元】【明】【聖】。(大正 25, 554d, n.3)

（三）中根者〔雖問而不隨行〕：人中來

復次，須菩提！菩薩摩訶薩先世聞深般若波羅蜜，問¹⁹中事而不行；捨身生時，聞是深般若波羅蜜，若一日、二日、三日、四日、五日，其心堅固無能壞者，若離所聞時便退失。

何以故？先世聞是深般若波羅蜜時，雖問中（554b）事，不如說行。是人或時欲聞、或時不欲聞，心輕不固、志亂不定，譬如輕毛隨風東西。²⁰

須菩提！當知是菩薩⁽¹⁾發意不久，⁽²⁾不與善知識相隨，⁽³⁾不多供養諸佛，⁽⁴⁾先世不書是深般若波羅蜜，⁽⁵⁾不讀、⁽⁶⁾不誦、⁽⁷⁾不正憶念，⁽⁸⁾不學般若波羅蜜、不學禪波羅蜜、不學毘梨耶波羅蜜、不學羸提波羅蜜、不學尸羅波羅蜜、不學檀波羅蜜，不學內空乃至無法有法空，不學四念處乃至八聖道分，不學四禪、四無量心、五神通、佛十力，乃至不學一切種智。

如是，須菩提！當知是菩薩摩訶薩新發大乘意，少信、少樂故，不能書是深般若波羅蜜，不能受持、讀、誦、說、正憶念。²¹

（貳）明中下根者無般若守護故，當墮二乘

一、正說其意

須菩提！若求佛道善男子、善女人不書是深般若波羅蜜，不受持讀誦、不說、不正憶念，亦不為深般若波羅蜜所護，乃至不為一切種智所護；是人亦不如說行深般若波羅蜜，乃至不如說行一切種智，是人或墮二地——若聲聞地、若辟支佛地。

何以故？是善男子、善女人不書是深般若波羅蜜，不讀、不誦、不說、不正憶念，是人亦不為深般若波羅蜜所護、亦不如說行。以是故，是善男子、善女人於二地中當墮一地。

¹⁹（1）〔不〕—【元】【明】【聖】【石】。（大正 25，554d，n.6）

（2）案：「問」前原有「不」字，今依經論前後文、元本等及異譯本刪。

（3）《放光般若經》卷 11〈51 大事興品〉：「復次，須菩提！若有菩薩聞般若波羅蜜，從一日至五日，常問中事；用是故，所生處常得聞深般若波羅蜜，終不離所問。何以故？須菩提！是菩薩但能得聞，問其中事，於行未備。」（大正 8，80a12-16）

（4）《摩訶般若波羅蜜經》卷 15〈50 成辦品〉：「復次，須菩提！菩薩摩訶薩先世聞深般若波羅蜜，問中事而不行。……何以故？先世聞是深般若波羅蜜時，雖問中事，不如說行。」（大正 8，329b6-12）

²⁰《大般若波羅蜜多經》卷 444〈48 成辦品〉：「復次，善現！有菩薩乘諸善男子、善女人等，雖於先世得聞般若波羅蜜多，亦曾請問甚深義趣，或經一日、二日、三日、四日、五日，而不如說精進修行。今生人中聞說如是甚深般若波羅蜜多，設經一日、二日、三日、四日、五日，其心堅固無能壞者；若離所聞甚深般若波羅蜜多，尋便退失，心生猶豫。何以故？善現！是菩薩乘諸善男子、善女人等由於先世得聞般若波羅蜜多，雖亦請問甚深義趣，而不如說精進修行故，於今生若遇善友慇懃勸勵，便樂聽受甚深般若波羅蜜多；若無善友慇懃勸勵，便於此經不樂聽受。彼於般若波羅蜜多，或時樂聞、或時不樂，或時堅固、或時退失，其心輕動，進退非恆，猶如輕毛隨風飄轉。」（大正 7，240a24-b8）

²¹《大般若波羅蜜多經》卷 444〈48 成辦品〉：「善現當知！是菩薩乘諸善男子、善女人等新趣大乘，於大乘法成就少分信敬愛樂，未能書寫、受持、讀誦、修習、思惟、為他演說甚深般若波羅蜜多。」（大正 7，240b24-27）

【論】

壹、般若依五事說甚深

(壹) 須菩提何以重說般若甚深

問曰：上來數說是般若波羅蜜甚深因緣，²²今何以復重說？

答曰：

一、多所饒益，非為重說，凡夫人以為重說

處處說甚深，多有所益；凡人不知，謂為重說。

譬如大國王未有嫡子，求禱神祇，積年²³無應。

時王出行，夫人產子男²⁴，遣信²⁵告王：「大夫人產男。」

王聞喜而不答，乃至十反。

使者白王：「向所白者王不聞耶？」

王曰：「我即聞之，久來願滿故，(554c) 喜心內悅，樂聞不已耳！」

即勅有司賜此人百萬兩金，一語十萬兩。

王聞使者言語，語中有利益，非重語²⁶，不知者謂為重。

處處說甚深亦如是——佛與菩薩、須菩提知大有利益，須菩提聞佛說深般若不能得底，轉覺甚深。聽者處處聞甚深，得禪定、智慧利益等；凡夫人謂為重說。

二、深淺無定，解者不以為深，不解者謂為甚深

復次，深淺無定，隨眾生——解者無深，不解者謂為深。

般若波羅蜜除佛無能遍知故，常²⁷言「甚深」。是故佛為眾生故說「甚深」，無定甚深相；若定甚深，無人能行。

是故言：「菩薩謂般若甚深，為不行般若波羅蜜。」²⁸

(貳) 佛述成並釋理

一、佛述成般若依五事說甚深

甚深因緣，所謂「為大事故起，乃至無等等事故起。」

大事等義如先說。²⁹

二、釋理：般若能含受五度乃至佛德

(一) 以含受義述成五事

1、正明

此中佛自說大事等因緣，所謂「般若波羅蜜含受五波羅蜜等諸法。」

²² 參見《大智度論》卷 70〈49 問相品〉(大正 25, 547c-552c)。

²³ 積年：1.多年，累年。《列子·周穆王》：“積年之疾，一朝都除。”(《漢語大詞典》(八)，p.131)

²⁴ 子男=男子【宋】【元】【明】【宮】。(大正 25, 554d, n.10)

²⁵ 遣信：猶傳信。南朝 宋 劉義慶《世說新語·文學》：“母王夫人在壁後聽之，再遣信令還。”(《漢語大詞典》(十)，p.1136)

²⁶ 語=說【宋】【元】【明】【宮】【聖】。(大正 25, 554d, n.12)

²⁷ 常=故【宋】【元】【明】。(大正 25, 554d, n.13)

²⁸ 深不深。(印順法師，《大智度論筆記》[E014] p.309)

²⁹ 《正觀》(6)，p.183：「大事故起、不可思議事故起、不可稱事故起、無等等事故起」，參見《大智度論》卷 70〈49 問相品〉(大正 25, 551a15-552c14)。

※ 因論生論：五度各異相，云何言「般若中含受」

問曰：五波羅蜜等各異相，云何言「般若波羅蜜中含受」？

答曰：

(1) 約經卷含受說

是中說經³⁰中含受。

(2) 約和合相應說

復次，五波羅蜜等諸法與般若波羅蜜和合方便迴向故，五波羅蜜等諸法³¹得至佛道。³²

2、舉喻明理

「灌頂王」如佛，「國事」是種種度眾生法，「大臣」是般若波羅蜜。

佛委仗般若波羅蜜成辦種種法故，安處禪定，快樂無事。

又如欲除乾薪草木，以火投中，則火力能燒令盡，人便無事。

(二) 舉不取不著諸法釋含受義

1、佛正明

復次，是般若波羅蜜不取、不著色等諸法故名「含受」。

初染曰「取」，生愛曰「著」。

2、須菩提問

須菩提問：「云何般若為色等諸法不取、不著故名含受？」

3、佛反問答

佛於四答³³中以反問答：「於汝意云何？以智慧眼見是色等法可取、可著不？」

須菩提意念：「若智慧眼見空、無相、無作、無量、不可思議相，云何當（555a）答色等法定相可取、可著？」

4、佛結成

佛可其所說：「汝未得一切智，不見色等諸法；我一切智人亦不見色等諸法。」是故歎言：「善哉！」

三、歎般若及行般若人

(一) 諸天歎

1、釋「二乘若智、若斷，即是菩薩無生法忍」

是時諸天子讚歎般若波羅蜜及行般若波羅蜜者，作是言：「若三千大千世界中眾生皆作信行、法行乃至辟支佛，若智、若斷——智者，十智。³⁴斷者，二種斷：有殘

³⁰ 經+（卷）【宋】【元】【明】【宮】【聖】【石】。（大正 25，554d，n.15）

³¹ 〔故五波羅蜜等諸法〕—【石】。（大正 25，554d，n.16）

³² 一、約經卷含受說

般若含受五度等—二、約和合相應說（印順法師，《大智度論筆記》〔B026〕p.163）

³³ 參見《中阿含經》卷 29（119 經）《說處經》（大正 1，609a24-b1）；《長阿含經》卷 8（9 經）《眾集經》（大正 1，51a28-b2）；《大智度論》卷 2〈1 序品〉（大正 25，75a17-19）、卷 22〈1 序品〉（大正 25，222c25-26）、卷 26〈1 序品〉（大正 25，253b14-15）等。

³⁴ 《大智度論》卷 2〈81 照明品〉：「十智：法智、比智、世智、他心智、苦智、集智、滅智、

斷、無殘斷；學人有殘斷，無學人無殘斷。不如是菩薩一日行深般若波羅蜜。何以故？是諸賢聖智、斷，皆是菩薩無生法忍。」

2、若「二乘若智、若斷即是菩薩無生法忍」，云何言「二乘人智斷不如菩薩一日行般若」

(1) 依悲智等異故云「不如」

問曰：若諸賢聖智、斷即是無生忍者，何以言「不如」？

答曰：信行等人⁽¹⁾無大悲、⁽²⁾捨眾生故不如；⁽³⁾無方便力，不能於涅槃自反。

譬如眾水³⁵會恒河俱入大海，欲入海時水勢湊³⁶急，眾生在中無能自反，惟有力者乃能自出。

復次，諸餘賢聖智、斷成就，菩薩始得無生忍而力能過之，是故勝。智、斷功德雖成就，不及菩薩初忍；譬如大臣功業雖大，不及太子。

復次，煖、頂、忍法是小乘初門，菩薩法忍是大乘初門；³⁷聲聞、辟支佛雖終成，尚不及菩薩初入道門，何況成佛！

(2) 依理境同故言「即是」

問曰：聲聞、辟支佛法是小乘，菩薩是大乘，云何言「二乘智、斷即是菩薩無生忍」？

答曰：所緣同，³⁸如、法性、實際亦同。

利鈍智慧為異，又有無量功德及大悲心守護故勝。

(二) 略辨餘文

餘種種說，是讚般若波羅蜜。

貳、明信解般若者之來處與得失

(壹) 明信解般若者有三類

行般若波羅蜜³⁹人有上、中、下：下者，聞般若波羅蜜直信聽受，不問中義；中者，既聞已，問義而不能行；上者，聞、解、能行。

下者，雖得人身，聞般若疑悔，難悟，根鈍、福薄故；中者，得人身，聞般若，一心（555b）信樂，能知義趣，從一日至四、五日，心能堅固；過是已往不能信樂，或欲聞、或欲聞，以其宿世雖解義而不能行，根鈍、福薄故；上者，得人身，聞般若，心即深解，信樂不捨，常隨法師。⁴⁰

道智、盡智、無生智。」（大正 25，70b1-3）其詳釋另參見《大智度論》卷 23〈1 序品〉（大正 25，232c16-234a14）。

³⁵ 水＝流【聖】【石】。（大正 25，555d，n.3）

³⁶ 湊（ㄔㄨㄛˋ）：1.會合，聚集。2.指會聚之處。3.趨，奔赴。（《漢語大詞典》（五），p.1438）

³⁷ 小乘四加行為初門，大乘無生忍為初門。（印順法師，《大智度論筆記》〔E020〕p.319）

³⁸ 小智小斷是菩薩無生忍：論約所緣同說。（印順法師，《大智度論筆記》〔E014〕p.311）

³⁹ 〔波羅蜜〕－【聖】【石】。（大正 25，555d，n.6）

⁴⁰ 下、直信聽受，不問中義——得人身，聞般若疑悔難悟。——當墮二乘行般若——中、聞已能問，問而不行——得人身，聞般若，始信堅固，終不信樂。——人三種——上、聞解能行——得人身，聞般若，心即深解，信樂不捨。

（印順法師，《大智度論筆記》〔B026〕p.162）

（貳）明中、下根者無般若守護故，當墮二乘

一、正說其意

上二種菩薩不能得上地故，當墮二乘，不為般若所守護故。

為更明了是事故，佛於後品中為作譬喻：如大海水中船破，若得所依則能渡，不得所依則不能渡。⁴¹

〈釋譬喻品第五十一〉⁴²

（大正 25，555b10-557b12）

【經】

（貳）明中下根者無般若守護故，當墮二乘（承上卷 71〈50 大事起品〉）

一、正說其意（承上卷 71〈50 大事起品〉）

二、舉喻明理⁴³

（一）海中船破喻

佛告須菩提：「譬如大海中船破壞，其中人若不取木、不取器物、不取浮囊、不取死屍，須菩提！當知是人不到彼岸，沒海中死。

須菩提！若船破時，其中人取木、取器物、浮囊、死屍者，當知是人終不沒死，安隱無礙，得到彼岸。

須菩提！求佛道善男子、善女人亦復如是，若但有信樂，不依深般若波羅蜜，不書、不讀、不誦、不正憶念；不依禪波羅蜜、毘梨耶波羅蜜、羼提波羅蜜、尸羅波羅蜜、檀波羅蜜，不書、不讀、不誦、不正憶念；乃至不依一切種智，不書、不讀、不誦、不正憶念。須菩提！當知是善男子中道衰耗，是人未到一切種智，於聲聞、辟支佛

⁴¹ 《正觀》(6)，p.183：〈51 譬喻品〉之前頭部分，見《大智度論》卷 71（大正 25，555b11-c2）。

⁴² （大智度論釋譬喻品第五十一）十二字 = （摩訶般若波羅蜜譬喻品第五十）十三字【聖】， = （摩訶般若波羅蜜品第五十譬喻品）十四字【石】，〔大智度論〕—【明】。（大正 25，555d，n.11）

⁴³ 關於以下佛所說的譬喻，依《大智度論》所說應有五喻，然從《摩訶般若波羅蜜經》經文與《大智度論》釋，卻只能歸類為四項。

同為「四喻」者，另參見：《道行般若經》卷 5（大正 8，451c6-452a29）；《大明度經》卷 4（大正 8，492c24-493a25）；《小品般若波羅蜜經》卷 5（大正 8，560a29-c29）；《佛說佛母出生三法藏般若波羅蜜多經》卷 14（大正 8，634b11-635b16）；《放光般若經》卷 11（大正 8，80b2-81b7）。

而《大般若波羅蜜多經》卷 444〈49 船等喻品〉（大正 7，240c17-242c6）與《大般若波羅蜜多經》卷 511〈17 譬喻品〉（大正 7，610b7-611b18）皆為「五喻」——於「海中船破喻」、「持瓶取水喻」之間，另有「度惡曠野喻」。

地取證。⁴⁴

須菩提！若有求佛道善男子、善女人為阿耨多羅三藐三菩提故，⁽¹⁾有信、⁽²⁾有忍、⁽³⁾有淨心、⁽⁴⁾有深心、⁽⁵⁾有欲、⁽⁶⁾有解、⁽⁷⁾有捨、⁽⁸⁾有精進，是人依深般若波羅蜜，書、持、讀、誦、說、正憶念；是善男子、善女人為阿耨多羅三藐三菩提故，有諸信、忍、淨心、深心、欲、解、捨、精進，為深般若波羅蜜所護乃至一切種智所護故，終不(555c)中道衰耗，過聲聞、辟支佛地，能淨佛世界、成就眾生，當得阿耨多羅三藐三菩提。⁴⁵

(二) 持瓶取水喻

須菩提！譬如男子、女人持坏⁴⁶瓶取水，當知是瓶不久爛壞。何以故？是瓶未熟故，還歸於地。

如是，須菩提！善男子、善女人雖有為阿耨多羅三藐三菩提心，有信、有忍、有淨心、有深心、有欲、有解、有捨、有精進，不為般若波羅蜜、方便力所守護，不為禪波羅蜜、毘梨耶波羅蜜、羸提波羅蜜、尸羅波羅蜜、檀波羅蜜所守護，不為內空乃至無法有法空、四念處乃至八聖道分、佛十力乃至一切種智所守護。須菩提！當知是人中道衰耗，墮聲聞、辟支佛地。

須菩提！譬如男子女人持熟瓶取水，若河、若井、若池、若泉，當知是瓶持水安隱。何以故？是瓶成熟故。

如是，須菩提！善男子、善女人求阿耨多羅三藐三菩提，有諸信、忍、淨心、深心、欲、解、捨、精進，為般若波羅蜜、方便力所護，為禪定、精進、忍、戒、施乃至一切種智所護故。須菩提！當知是人中道衰耗，過聲聞、辟支佛地，能淨⁴⁷世界、成就眾生，得阿耨多羅三藐三菩提。

(三) 船寶航行喻

須菩提！譬如大海邊船未莊治，便持財物著上，須菩提！當知是船中道壞沒，船與財物各在一處；是估⁴⁸客⁴⁹無方便力故，亡其重寶。

⁴⁴ 《大般若波羅蜜多經》卷 444〈49 船等喻品〉：「如是，善現！若菩薩乘諸善男子、善女人等，雖於大乘成就少分信敬愛樂，若不書寫、受持、讀誦、思惟、修習、為他演說甚深般若波羅蜜多為所依附，當知如是住菩薩乘諸善男子、善女人等，中道衰敗，不證無上正等菩提，退入聲聞或獨覺地。」(大正 7, 240c22-28)

⁴⁵ 《大般若波羅蜜多經》卷 444〈49 船等喻品〉：「如是，善現！若菩薩乘諸善男子、善女人等，已於無上正等菩提有信、有忍、有清淨心、有勝意樂、有欲勝解、有捨精進，復能攝受甚深般若波羅蜜多及餘功德，當知如是住菩薩乘諸善男子、善女人等，終不中道損耗退敗，超聲聞地及獨覺地，成熟有情、嚴淨佛土，疾證無上正等菩提。」(大正 7, 241a14-20)

⁴⁶ 坏(ㄉㄞˋ)：沒有燒過的磚瓦陶器。《說文·土部》：「坏，瓦未燒。」(《漢語大字典》(一)，p.421)

⁴⁷ 能淨=能淨佛【宋】【元】【明】【宮】，=淨佛【聖】【石】。(大正 25, 555d, n.17)

⁴⁸ (1) 估=賈【元】【明】。(大正 25, 555d, n.18)

(2) 估：5.行商，商人。(《漢語大詞典》(一)，p.1224)

⁴⁹ 估客：即行商。(《漢語大詞典》(一)，p.1224)

如是，須菩提！是求佛道善男子、善女人雖有為阿耨多羅三藐三菩提心，有信、忍、淨心、深心、欲、解、捨、精進，不為般若波羅蜜、方便力所守護，乃至不為一切種智所守護故，當知是人中道衰耗，失大珍寶。

大珍寶者，所謂一切種智。

衰耗者，墮聲聞、辟支佛地。⁵⁰

須菩提！譬如（556a）人⁵¹有智、方便莊治海邊大船，然後推著水中，持財物著上而去，當知是船不中道沒壞，必得安隱到所至處。

如是，須菩提！善男子、善女人為阿耨多羅三藐三菩提，有信、忍、淨心、深心、欲、解、捨、精進，為般若波羅蜜、方便力所護，為禪、精進、忍、持⁵²戒、施乃至一切種智所護故，當知是菩薩得到阿耨多羅三藐三菩提，不中道墮聲聞、辟支佛地。

（四）耆年起行喻

須菩提！譬如有人年百二十歲，年耆根熟，又有風、冷、熱病、若雜病。須菩提！於汝意云何：是人能從床起不？」

須菩提言：「不能。」

佛言：「是人或⁵³能起者，云何？」

須菩提言：「是人雖能起，不能遠行若十里、若二十里，以其老病故。」

「如是，須菩提！善男子、善女人雖有為阿耨多羅三藐三菩提心，有信、忍、淨心、深心、欲、解、捨、精進，不為般若波羅蜜、方便力所守護，乃至不為一切種智所守護故，當知是人中道墮聲聞、辟支佛地。何以故？不為般若波羅蜜、方便力所守護故。」

須菩提！如向老人百二十歲，年耆根熟，又有風、冷、熱病、若雜病，是人欲起行，有兩健人各扶一腋，語老人言：『莫有所難，隨所欲至，我等二人終不相捨。』

如是，須菩提！若善男子、善女人為阿耨多羅三藐三菩提，有信、忍、淨心、深心、欲、解、捨、精進，為般若波羅蜜、方便力所護，乃至為一切種智所護，當知是人中道墮聲聞、辟支佛地，能到是處，所謂阿耨多羅三藐三菩提。」

【論】釋曰：

二、舉喻明理

（一）別辨「信乃至精進八功德相」

菩薩有二種：一者、得諸法實相；二者、雖未得實相，於佛道中有信、有忍、有（556b）

⁵⁰ 《大般若波羅蜜多經》卷 444〈49 船等喻品〉：「如是，善現！有菩薩乘諸善男子、善女人等，設於無上正等菩提有信、有忍、有清淨心、有勝意樂、有欲勝解、有捨精進，若不攝受甚深般若波羅蜜多方便善巧，則便遠離般若、靜慮、精進、安忍、淨戒、布施波羅蜜多，如是乃至遠離一切智、道相智、一切相智，當知如是住菩薩乘諸善男子、善女人等，中道衰敗，喪失身命及大財寶。喪身命者，謂墮聲聞或獨覺地；失財寶者，謂失無上正等菩提。」（大正 7，241c6-14）

⁵¹ （有）+人【宋】【元】【明】【宮】。（大正 25，556d，n.1）

⁵² 忍持=忍辱【元】【明】【聖】，=忍【石】。（大正 25，556d，n.2）

⁵³ 或+（有）【宋】【元】【明】【聖】。（大正 25，556d，n.4）

淨心、有深心、有欲、有解、有捨、有精進。⁵⁴

- (1)「信」者，信「罪福業因緣果報」，信「行六波羅蜜得阿耨多羅三藐三菩提」。
- (2)有人雖信佛道，思惟、籌量，心不能忍，是故說「有忍」。
- (3)有人雖忍，邪疑未斷，故心濁不淨，是故說「有淨」。
- (4)有人雖信、忍、心淨，而有淺、有深，是故說「深心」。
- (5)四事⁵⁵因緣故，一心欲得無上道，不欲餘事，是故說「有欲」。
- (6)了了決定知無上道為大、世間餘事為小，是故說「有解」。
- (7)以欲、解定心故，捨財及捨諸惡心、慳、恚等煩惱，是故說「捨」。
- (8)為捨故常能「精進」。

有如是等諸功德。

〔二〕明不得般若波羅蜜之過失

若不得般若波羅蜜，若身壞命終時，若惡知識沮壞，則失菩薩道；世間功德故受世間果報，然後墮聲聞、辟支佛地，不能至無上道。

〔三〕釋五喻（四喻）

此中佛自說五譬喻⁵⁶：

1、海中船破喻

「船」是行者身。

「浮囊等物」即是般若、方便。

2、持瓶取水喻

「瓶」是菩薩道。

般若、方便是「火」。

未與般若、方便和合故，不能受持六波羅蜜功德水至無上道。

3、船寶航行喻

「不補治船」，是菩薩無方便。

信等功德寶物，是五波羅蜜等諸善法「船」⁵⁷。

「寶異處」者，與本願乖異，或受人天樂、或墮二乘。

「大利」者，所謂一切智等佛法寶。

4、耆年起行喻

「老病人」是有信等功德菩薩。

不斷六十二邪見⁵⁸故名「老」。

⁵⁴ 「得諸法實相。」

二種菩薩未得（諸法實相），於佛道中有信、忍、淨心、深心、欲、解、捨*、精進。
（印順法師，《大智度論筆記》〔B026〕p.162）

※案：印順法師筆記原無「捨」，今依經論增補。

⁵⁵ 四事：指有信、有忍、有淨心、有深心。

⁵⁶ 此處《大智度論》說有五喻，但《摩訶般若波羅蜜經》經文與《大智度論》釋僅提到四喻。

⁵⁷ 船+（船）【宋】【元】【明】【宮】。（大正 25，556d，n.11）

⁵⁸ 參見《長阿含經》卷 14（21 經）《梵動經》（大正 1，89c19-94a12）。

不斷百八等諸煩惱⁵⁹故名「病」。

「從床起」者，從三界床起，我當作佛。以邪見煩惱因緣故不能成菩薩道。

「二人」者，般若及方便。

般若波羅蜜能滅諸邪見、煩惱、戲論，將⁶⁰至畢竟空中。

方便將出畢竟空。⁶¹

【經】

（參）更明求佛道之無方便義與有方便義

一、辨無方便

爾時，佛語須菩提言：「善哉！善哉！須菩提！汝為諸菩薩摩訶薩問佛是事。

須菩提！若有（556c）求佛道善男子、善女人，從初發意已來，以我、我所心布施、持戒、忍辱、精進、禪定、智慧；

是善男子、善女人布施時作是念：『我是施主，我施是人，我施是物⁶²。我持戒，我修忍，我精進，我入禪，我修智慧。』

是善男子、善女人念『有是施，是我施』，乃至念『有是慧，是我慧』。

何以故？檀波羅蜜中無如是分別，遠離此彼岸是檀波羅蜜相；尸羅波羅蜜、羼提波羅蜜、毘梨耶波羅蜜、禪波羅蜜，般若波羅蜜中無如是分別。何以故？遠離此彼岸是般若波羅蜜相。

是人不知此岸、不知彼岸，是人不為檀波羅蜜乃至不為一切種智所護故，墮聲聞、辟支佛地，不能到薩婆若。⁶³

⁵⁹（1）《大智度論》卷 7〈1 序品〉：「如迦旃延子阿毘曇義中說：十纏、九十八結，為百八煩惱。」（大正 25，110b6-7）

（2）《大智度論》卷 7〈1 序品〉：「纏者，十纏：瞋纏、覆罪纏、睡纏、眠纏、戲纏、掉纏、無慚纏、無愧纏、慳纏、嫉纏。」（大正 25，110a26-27）

（3）另參見《大毘婆沙論》卷 47（大正 27，243c20-26）。

⁶⁰（1）將（ㄩ一ㄨ）：9.帶領，攜帶。

（2）將（ㄩ一ㄨ、）：3.統率，指揮。（《漢語大詞典》（七），p.805）

⁶¹「般若——能滅邪見、戲論，將至畢竟空。

般若方便—方便——將出畢竟空。（印順法師，《大智度論筆記》〔B026〕p.162）

⁶²我施是物=我以是物施【聖】，但有「我施是物」四字傍註。（大正 25，556d，n.14）

⁶³《大般若波羅蜜多經》卷 444〈49 船等喻品〉：

善現當知！有菩薩乘諸善男子、善女人等，從初發心執我、我所修行布施乃至般若波羅蜜多，此善男子、善女人等修布施時作如是念：「我能行施，我施此物，彼受我施。」修淨戒時作如是念：「我能持戒，我持此戒，我具是戒。」修安忍時作如是念：「我能修忍，我於彼忍，我具是忍。」修精進時作如是念：「我能精進，我為此精進，我具是精進。」修靜慮時作如是念：「我能修定，我為此修定，我具是定。」修般若時作如是念：「我能修慧，我為此修慧，我具是慧。」

復次，善現！此善男子、善女人等修布施時，執有是布施，執由此布施，執布施為我所；修淨戒時，執有是淨戒，執由此淨戒，執淨戒為我所；修安忍時，執有是安忍，執由此安忍，執安忍為我所；修精進時，執有是精進，執由此精進，執精進為我所；修靜慮時，執有是靜

須菩提！云何求佛道人無方便？

須菩提！求佛道人從初發心已來無方便行布施、持戒、忍辱、精進、禪定、修智慧。是人作如是念：『我布施，施是人，以是物施；我持戒、修忍辱⁶⁴、勤精進、入禪定，修智慧——如是修智慧。』

是人念『有是施，是我施』，以是施自高；念『有是戒，是我戒』，以是戒自高；念『有是忍，是我忍』，以是忍自高；念『有是精進，是我精進』，以是精進自高；念『有是禪定，是我禪⁶⁵定⁶⁶』，以是禪定⁶⁷自高；念『有是慧，是我慧』，以是慧自高。

何以故？檀波羅蜜中無如是分別，遠離此彼岸是檀波羅蜜相；遠離此彼岸是尸羅波羅蜜相；遠離此彼岸是羼提波羅蜜相；遠離此彼岸是毘梨耶波羅蜜相；遠離此彼岸是禪波羅蜜相；遠離此彼岸是般若波羅蜜相。何以故？般若波羅蜜中無如是憶念分別。

是求佛道善男子、善女人不知此岸、不知彼岸，是人為檀波羅蜜所護，(557a) 不為尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜所護故，乃至不為一切種智所護故，或墮聲聞道中、或墮辟支佛道中，不能得到薩婆若。

如是，須菩提！菩薩摩訶薩不為般若波羅蜜、方便力所守護故，或墮聲聞地、或墮辟支佛道中。⁶⁸

二、辨有方便

須菩提！云何菩薩摩訶薩為般若波羅蜜、方便力所守護故，不墮聲聞、辟支佛道中，疾得阿耨多羅三藐三菩提？

須菩提！菩薩從初已來，以方便力布施，無我、我所心布施，乃至無我、我所心修智慧。是人不作是念『我有是施，是我施』，不以是施自高；乃至般若波羅蜜亦如是。

慮，執由此靜慮，執靜慮為我所；修般若時，執有是般若，執由此般若，執般若為我所。是善男子、善女人等，我、我所執恒隨逐故，所行布施乃至般若波羅蜜多，增長生死，不能解脫生等眾苦。所以者何？布施波羅蜜多中無如是分別可起此執，乃至般若波羅蜜多中亦無如是分別可起此執。何以故？遠離此彼岸是布施波羅蜜多相，乃至是般若波羅蜜多相故。

善現當知！此菩薩乘諸善男子、善女人等不知此岸、彼岸相故，不能攝受布施、淨戒、安忍、精進、靜慮、般若波羅蜜多，乃至不能攝受一切智、道相智、一切相智。由是因緣，此菩薩乘諸善男子、善女人等，墮聲聞地或獨覺地，不證無上正等菩提。」(大正 7, 242b6-c6)

⁶⁴ [辱] — 【宋】【元】【明】【宮】。(大正 25, 556d, n.15)

⁶⁵ 禪+ (定)【聖】【石】。(大正 25, 556d, n.16)

⁶⁶ 案：《大正藏》原作「禪」，今依《高麗藏》作「禪定」(第 14 冊, 1085a15)。

⁶⁷ [定] — 【宋】【元】【明】【宮】。(大正 25, 556d, n.17)

⁶⁸ 《大般若波羅蜜多經》卷 445〈49 船等喻品〉：「所以者何？布施波羅蜜多中無如是分別，亦不如彼所分別。何以故？非至此彼岸是布施波羅蜜多相故，乃至般若波羅蜜多中無如是分別，亦不如彼所分別。何以故？非至此彼岸是般若波羅蜜多相故。

善現當知！此菩薩乘諸善男子、善女人等，不知此、岸彼岸相故，不能攝受布施、淨戒、安忍、精進、靜慮、般若波羅蜜多，如是乃至不能攝受一切智、道相智、一切相智。由此因緣，是菩薩乘諸善男子、善女人等，墮聲聞地或獨覺地，不證無上正等菩提。善現！住菩薩乘諸善男子、善女人等，如是無方便善巧修行六波羅蜜多，墮於聲聞或獨覺地，不證無上正等菩提。」(大正 7, 243a10-22)

是菩薩不念『我布施』，不念『我施是人，用是物施』；不念『我持戒，有是戒』；不念『我忍辱，有是忍辱』；不念『我精進，有是精進』；不念『我禪定，有是禪定』；不念『我修智慧，有是智慧』。

何以故？是檀波羅蜜中無如是分別，遠離此彼岸是檀波羅蜜相；遠離此彼岸是尸羅波羅蜜相；遠離此彼岸是羼提波羅蜜相；遠離此彼岸是毘梨耶波羅蜜相；遠離此彼岸是禪波羅蜜相；遠離此彼岸是般若波羅蜜相。何以故？是般若波羅蜜中無如是憶想分別。

是菩薩摩訶薩知此岸、知彼岸，是人為檀波羅蜜所護、為尸羅波羅蜜所護、為羼提波羅蜜所護、為毘梨耶波羅蜜所護、為禪波羅蜜所護、為般若波羅蜜所護，乃至為一切種智所護故，不墮聲聞、辟支佛地，得到薩婆若。

如是，須菩提！菩薩摩訶薩為般若波羅蜜、方便力所護故，不墮聲聞、辟支佛地，疾得阿耨（557b）多羅三藐三菩提。」⁶⁹

【論】釋曰：

（參）明求佛道之無方便義與有方便義

一、辨無方便

爾時，佛可須菩提意，更說失行因緣：「菩薩雖行信等善法，亦不得無上道，所謂以我、我所心行六波羅蜜故。」

是中無分別此岸、彼岸，以遠離相是般若波羅蜜；而分別著行——是為失。

上佛雖說無方便義，⁷⁰不說無方便名；欲令是事明了故，命須菩提：「云何有方便、無方便？」

二、辨有方便

內無我、我所心，外觀一切法空不取相，般若、方便乃至一切種智守護菩薩故，名「有方便」。⁷¹

⁶⁹ 《大般若波羅蜜多經》卷 445〈49 船等喻品〉：「所以者何？布施波羅蜜多中無如是分別可起此執，乃至般若波羅蜜多中亦無如是分別可起此執。何以故？遠離此彼岸是布施波羅蜜多相，乃至是般若波羅蜜多相故。」

善現當知！此菩薩乘諸善男子、善女人等，善知此岸、彼岸相故，便能攝受布施、淨戒、安忍、精進、靜慮、般若波羅蜜多，如是乃至能攝受一切智、道相智、一切相智。由是因緣，此菩薩乘諸善男子、善女人等，不墮聲聞及獨覺地，速證無上正等菩提。」（大正 7，243b18-27）

⁷⁰ （1）《正觀》（6），p.184：《大智度論》卷 71〈51 譬喻品〉（大正 25，555b-556a）的前半段，經文用幾個譬喻來說明「有方便」、「無方便」，但沒有解說其意義，所以在同一品的後半段來說明。

（2）依據印順法師，《大智度論筆記》〔B019〕p.146 所示，應指《大智度論》卷 56〈31 滅諍亂品〉：「以要言之，無方便者，雖行六波羅蜜，內不能離我心、外取諸法相，所謂我是施者、彼是受者、是布施物，是因緣故，不能到佛道；與此相違，是有方便。」（大正 25，463b6-9）

⁷¹ 「內不離我心

無方便—外取諸法相

有方便

（印順法師，《大智度論筆記》〔B019〕p.146）

「守護」者，五波羅蜜邊得功德力，般若波羅蜜邊得智慧力——以二因緣故不失道⁷²。⁷³

〈釋善⁷⁴知識品第五十二⁷⁵〉⁷⁶
(大正 25, 557b13-560c28)

【經】

壹、新學菩薩應依善知識學，觀法性空

(壹) 須菩提問

爾時，須菩提白佛言：「世尊！新學菩薩摩訶薩云何應學般若波羅蜜、禪波羅蜜、毘梨耶波羅蜜、羼提波羅蜜、尸羅波羅蜜、檀波羅蜜？」⁷⁷

(貳) 佛答

一、當親近善士

佛告須菩提：「新學菩薩摩訶薩若欲學般若波羅蜜，禪、精進、忍、戒、檀波羅蜜，先當親近、供養善知識能說是深般若波羅蜜者。」

二、隨善士之教

(一) 所有善根迴向佛道

是人作是教：『汝善男子⁷⁸！所有布施，一切迴向阿耨多羅三藐三菩提；善男子！所有持戒、忍辱、精進、禪定、智慧，一切迴向阿耨多羅三藐三菩提。』

(二) 不取，不貪，觀法性空

1、不取

汝莫以色是阿耨多羅三藐三菩提，莫以受、想、行、識是阿耨多羅三藐三菩提；⁷⁹莫以檀波羅蜜是阿耨多羅三藐三菩提，莫以尸羅波羅蜜、羼提波羅蜜、毘梨耶波羅蜜、

⁷² 道+ (釋第五十品竟)【聖】【石】。(大正 25, 557d, n.7)

⁷³ 二緣不失道。(印順法師,《大智度論筆記》[E018] p.316)

⁷⁴ [善]—【宋】【元】【明】【明】。(大正 25, 557d, n.10)

⁷⁵ 二+ (經作善智識品)細註【明】，二+ (品)【宮】。(大正 25, 557d, n.11)

⁷⁶ (大智度論釋善知識品第五十二)十三字= (摩訶般若波羅蜜智識教發心品第五十一)十七字【聖】，=(摩訶般若波羅蜜第五十一善智識教發心品)十九字【石】，〔大智度論〕—【明】。(大正 25, 557d, n.8)

⁷⁷ 《大般若波羅蜜多經》卷 445〈50 初業品〉：

爾時，具壽善現白佛言：「世尊！初業菩薩摩訶薩，應云何學般若、靜慮、精進、安忍、淨戒、布施波羅蜜多？」(大正 7, 244a9-11)

⁷⁸ 《大正藏》原作「于」，今依《高麗藏》作「子」(第 14 冊, 1086a13)。

⁷⁹ 《大般若波羅蜜多經》卷 445〈50 初業品〉：「汝勿以色而取無上正等菩提，亦勿以受、想、行、識而取無上正等菩提。」(大正 7, 244a19-20)

禪波羅蜜、般若波羅蜜是阿耨多羅三藐三菩提；

莫以內空乃至無法有法空是阿耨多（557c）羅三藐三菩提；

莫以四念處、四正勤、四如意足、五根、五力、七覺分、八聖道分是阿耨多羅三藐三菩提；

莫以四禪、四無量心、四無色定、五神通是阿耨多羅三藐三菩提；

莫以佛十力乃至十八不共法是阿耨多羅三藐三菩提。

所以者何？不取色便得阿耨多羅三藐三菩提，不取受、想、行、識便得阿耨多羅三藐三菩提；不取檀波羅蜜乃至般若波羅蜜便得阿耨多羅三藐三菩提；不取內空乃至無法有法空；不取四念處乃至十八不共法便得阿耨多羅三藐三菩提。⁸⁰

2、不貪

善男子！行是深般若波羅蜜時莫貪色。何以故？善男子！是色非可貪者。莫貪受、想、行、識。何以故？受、想、行、識非可貪者。⁸¹

善男子！莫貪檀波羅蜜、尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜，莫貪內空乃至無法有法空，莫貪四念處乃至八聖道分，莫貪四禪、四無量心、四無色定、五神通，莫貪佛十力乃至一切種智。何以故？一切種智非可貪者。

善男子！莫貪須陀洹果乃至阿羅漢果，莫貪辟支佛道，莫貪菩薩法位，莫貪阿耨多羅三藐三菩提。何以故？阿耨多羅三藐三菩提非可貪者。

3、辨因：觀法性空

所以者何？諸法性⁸²空故。』⁸³

【論】

壹、佛以不取、不貪、觀法性空，明新學所行事

問曰：須菩提問新學所行，佛何以乃答菩薩久行微妙事——所謂「不取一切法，一切法性空故」？

答曰：

（壹）此中說小菩薩所學柔順忍之空

「諸法性空」有二種：一者、大菩薩所得；二者、小菩薩所學柔順忍，以智慧發心。⁸⁴此中但說小菩薩所學空。

⁸⁰ 無上菩提：無可著處。（印順法師，《大智度論筆記》〔E001〕p.285）

⁸¹ 《大般若波羅蜜多經》卷 445〈50 初業品〉：「汝善男子！修行甚深般若波羅蜜多時，勿於色生貪愛，勿於受、想、行、識生貪愛。所以者何？色乃至識非可貪愛。何以故？以一切法自性空故。」（大正 7，244c11-14）

⁸² （自）+性【宋】【元】【明】【聖】【石】。（大正 25，557d，n.14）

⁸³ 《大般若波羅蜜多經》卷 445〈50 初業品〉：「勿於預流果生貪愛，勿於一來、不還、阿羅漢果、獨覺菩提生貪愛。所以者何？預流果乃至獨覺菩提非可貪愛。何以故？以一切法自性空故。勿於一切菩薩摩訶薩行生貪愛，勿於諸佛無上正等菩提生貪愛。所以者何？一切菩薩摩訶薩行、諸佛無上正等菩提非可貪愛。何以故？以一切法自性空故。」（大正 7，245b21-28）

⁸⁴ 大菩薩所得。

二種性空—小菩薩所學柔順忍。（印順法師，《大智度論筆記》〔B026〕p.163）

【貳】得般若氣分者名為新學菩薩

復次，有實⁸⁵智慧氣分，佛數為菩薩；⁸⁶若無者，雖久行餘（558a）功德，不數為菩薩。譬如佛說聲聞法中頂法相：於三寶中有少信是名「頂法」；⁸⁷是信——過煖法，修禪定生，以色界心得；於佛無礙解脫是為小，於凡夫為大。

如是新發意菩薩得般若波羅蜜氣味故能受化，名為「新學」；過五波羅蜜功德；於凡夫為大，於佛為小。

【參】先親近善士，後觀法性空

復次，佛不直說諸法性空，先教供養、親近善知識；⁸⁸善知識為說五波羅蜜功德。善知識雖種種教化，佛但稱其「不壞法」——所謂於色等諸法不貪、不著、不取。

譬如金翅鳥子始生，從一須彌至一須彌；菩薩亦如是，初學能生如是深智，何況久學！又如小火能燒，何況大者！菩薩亦如是，新學時能以般若轉世間法令畢竟空，燒諸煩惱，⁸⁹何況得力具足！

【經】**貳、菩薩能為難事、安隱世間等故，發無上菩提心****（壹）須菩提歎**

須菩提白佛言：「世尊！諸菩薩摩訶薩能為難事——於一切性空法中求阿耨多羅三藐三菩提，欲得阿耨多羅三藐三菩提。」

（貳）佛述成，更讚餘因緣**一、佛述成**

佛言：「如是！如是！須菩提！菩薩摩訶薩能為難事——於一切性空法中求阿耨多羅三藐三菩提，欲得阿耨多羅三藐三菩提。」

二、更讚餘希有因緣**※總說**

須菩提！諸菩薩摩訶薩⁽¹⁾為安隱世間故，發阿耨多羅三藐三菩提心；⁽²⁾為安樂世間故、⁽³⁾為救世間故、⁽⁴⁾為世間歸故、⁽⁵⁾為世間依處故、⁽⁷⁾為世間洲故、⁽⁸⁾為世間將導故、⁽⁶⁾為世間究竟道故、⁽⁹⁾為世間趣故，發阿耨多羅三藐三菩提心。⁹⁰

⁸⁵ [實] — 【宋】【元】【明】【宮】。(大正 25, 557d, n.15)

⁸⁶ 智慧氣分，數為菩薩。(印順法師，《大智度論筆記》[E021] p.319)

⁸⁷ (1) 關於「頂法」，參見《中阿含經》卷 21 (86 經)《說處經》(大正 1, 565c1-19)。

(2) 參見《發智論》卷 1 (大正 26, 918c20-919a8)、《大毘婆沙論》卷 6 (大正 27, 26b9-c5) 等。依論書所說，此乃佛為波羅衍拏摩納婆(儒童)說。

(3) 另參見《大智度論》卷 48 (19 四念處品)(大正 25, 405b9-20)。

⁸⁸ 新學先近善知識。(印順法師，《大智度論筆記》[E021] p.319)

⁸⁹ 新學能令世法畢竟空，燒諸煩惱。(印順法師，《大智度論筆記》[E021] p.319)

⁹⁰ (1)《大般若波羅蜜多經》卷 445 (50 初業品)：「善現！諸菩薩摩訶薩雖達一切法如幻、如夢、如響、如像、如光影、如陽焰、如變事、如尋香城自性皆空，而為世間得義利故，發趣無上正等菩提；為令世間得饒益故，發趣無上正等菩提；為令世間得安樂故，發趣

※ 別辨

（一）為安隱世間故

須菩提！云何菩薩摩訶薩為安隱世間故發阿耨多羅三藐三菩提心？

須菩提！菩薩摩訶薩得阿耨多羅三藐三菩提時，拔出六道眾生，著無畏岸涅槃(558b)處。

須菩提！是為菩薩摩訶薩為安隱世間故發阿耨多羅三藐三菩提心。

（二）為安樂世間故

云何菩薩摩訶薩為安樂世間故發阿耨多羅三藐三菩提心？

須菩提！菩薩摩訶薩得阿耨多羅三藐三菩提時，拔出眾生種種憂苦愁惱，著無畏岸涅槃處。

須菩提！是為菩薩摩訶薩為安樂世間故發阿耨多羅三藐三菩提心。

（三）為救世間故

云何菩薩摩訶薩為救世間故發阿耨多羅三藐三菩提心？

須菩提！菩薩摩訶薩得阿耨多羅三藐三菩提時，救眾生生死中種種苦，亦為斷是苦故而為說法；眾生聞法，漸以三乘而得度脫。

須菩提！是為菩薩摩訶薩為救世間故發阿耨多羅三藐三菩提心。

（四）為世間歸故

云何菩薩摩訶薩為世間歸故發阿耨多羅三藐三菩提心？

須菩提！菩薩摩訶薩得阿耨多羅三藐三菩提時，拔出眾生生老病死相、憂悲愁⁹¹惱法，著無畏岸涅槃處。

須菩提！是為菩薩摩訶薩為世間歸故發阿耨多羅三藐三菩提心。⁹²

（五）為世間依處故

云何菩薩摩訶薩為世間依處故發阿耨多羅三藐三菩提心？

須菩提！菩薩摩訶薩得阿耨多羅三藐三菩提時，為眾生說一切法無依處。

須菩提！是為菩薩摩訶薩為世間依處故發阿耨多羅三藐三菩提心。」

須菩提白佛言：「世尊！云何一切法無依處？」

無上正等菩提；為欲濟拔諸世間故，發趣無上正等菩提；為與世間作歸依故，發趣無上正等菩提；為與世間作舍宅故，發趣無上正等菩提；欲示世間究竟道故，發趣無上正等菩提；為與世間作洲渚故，發趣無上正等菩提；為與世間作日月故，發趣無上正等菩提；為與世間作燈燭故，發趣無上正等菩提；為與世間作導師故，發趣無上正等菩提；為與世間作將帥故，發趣無上正等菩提；為與世間作所趣故，發趣無上正等菩提；哀愍世間生死苦故，發趣無上正等菩提。」（大正 7，245c5-20）

（2）案：本段經文所標之序號乃依據下文敘述之次第。

⁹¹ 愁=苦【聖】【石】。（大正 25，558d，n.4）

⁹² 《大般若波羅蜜多經》卷 445〈50 初業品〉：「善現！云何菩薩摩訶薩為與世間作舍宅故，發趣無上正等菩提？善現！諸菩薩摩訶薩欲為有情作依止處，及令至得無怖無畏大涅槃宮故，發趣無上正等菩提。善現！是為菩薩摩訶薩為與世間作舍宅故，發趣無上正等菩提。」（大正 7，246a21-26）

佛言：「色不相續即是色無生，色無生即是色不滅，色不滅即是色無依處；受、想、行、識乃至一切種智亦如是。

須菩提！是為菩薩摩訶薩為世間依處故發阿耨多羅三藐三菩提心。⁹³

〔六〕為世間究竟道故

云何菩薩摩訶薩為世間究竟道故發阿耨多羅三藐三菩提心？（558c）

須菩提！若⁹⁴菩薩摩訶薩得阿耨多羅三藐三菩提時，為眾生說如是法——色究竟相非是色，⁹⁵受、想、行、識，乃至一切種智究竟相非是一切種智。

須菩提！如究竟相，一切法相亦如是。」⁹⁶

須菩提言：「世尊！若一切法如究竟相者，諸菩薩摩訶薩皆應得⁹⁷阿耨多羅三藐三菩提。何以故？世尊！色究竟相中無有分別，受、想、行、識究竟相中無有分別，乃至一切種智究竟相中無有分別——所謂是色，是受、想、行、識，乃至是一切種智。」

佛告須菩提：「如是！如是！色究竟相中無有分別，受、想、行、識乃至一切種智究竟相中無有分別——所謂是色乃至是一切種智。須菩提！是為菩薩摩訶薩難事。

如是觀諸法寂滅相，而心不沒不却⁹⁸。何以故？是菩薩摩訶薩作是念：『是諸深法，我應如是知，得阿耨多羅三藐三菩提；如是寂滅微妙法，當為眾生說。』

是為菩薩摩訶薩為世間究竟道故發阿耨多羅三藐三菩提心。⁹⁹

〔七〕為世間洲故

云何菩薩摩訶薩為世間洲故發阿耨多羅三藐三菩提心？

須菩提！若江河大海，四邊水斷，是名¹⁰⁰為洲。

⁹³ 《大般若波羅蜜多經》卷 445〈50 初業品〉：「善現！云何菩薩摩訶薩為與世間作歸依故，發趣無上正等菩提？善現！諸菩薩摩訶薩欲為有情說無依法，謂色無依，受、想、行、識無依，如是乃至一切智無依，道相智、一切相智無依，令諸有情聞已，解脫一切生老病死及愁歎苦憂惱，由此因緣發趣無上正等菩提。善現！是為菩薩摩訶薩為與世間作歸依故，發趣無上正等菩提。」（大正 7，246a13-21）

⁹⁴ 〔若〕—【聖】【石】。（大正 25，558d，n.5）

⁹⁵ 畢竟不生不名為色。（印順法師，《大智度論筆記》〔E008〕p.301）

⁹⁶ 《大般若波羅蜜多經》卷 445〈50 初業品〉：

具壽善現白言：「世尊！若一切法相如究竟相者，云何菩薩摩訶薩於一切法應現等覺？所以者何？世尊！非色究竟中有如是分別，謂此是色；亦非受、想、行、識究竟中有如是分別，謂此是受、想、行、識。如是乃至非一切智究竟中有如是分別，謂此是一切智；亦非道相智、一切相智究竟中有如是分別，謂此是道相智、一切相智。」（大正 7，246b9-16）

⁹⁷ 得=行【宋】【元】【明】【宮】。（大正 25，558d，n.7）

⁹⁸ 却=怯【宋】【元】【明】。（大正 25，558d，n.8）

⁹⁹ 《大般若波羅蜜多經》卷 445〈50 初業品〉：

佛告善現：「如是！如是！如汝所說。色究竟中無如是分別，謂此是色；受、想、行、識究竟中亦無如是分別，謂此是受、想、行、識。如是乃至一切智究竟中無如是分別，謂此是一切智；道相智、一切相智究竟中無如是分別，謂此是道相智、一切相智——以一切法本性空故。善現！是為菩薩摩訶薩最極難事，謂雖觀一切法皆寂滅相甚深微妙而心不沈沒，作是念言：『我於是法現等覺已，證得無上正等菩提，為諸有情宣說開示如是寂滅深妙之法。』善現！是為菩薩摩訶薩欲示世間究竟道故，發趣無上正等菩提。」（大正 7，246b16-28）

¹⁰⁰ 〔名〕—【宋】【元】【明】【宮】。（大正 25，558d，n.9）

須菩提！色亦如是前後際斷，受、想、行、識前後際斷，乃至一切種智前後際斷。以是前後際斷故，一切法亦斷。須菩提！是一切法前後際斷故，即是寂滅、即是妙寶——所謂空、無所得、愛盡無餘、離欲、涅槃。須菩提！菩薩摩訶薩得阿耨多羅三藐三菩提時，以寂滅微妙法為眾生說。

須菩提！是為菩薩摩訶薩為世間洲故發阿耨多羅三藐三菩提心。

（八）為世間將導故

云何菩薩摩訶薩為世間將導故發阿耨多（559a）羅三藐三菩提心¹⁰¹？

須菩提！菩薩摩訶薩得阿耨多羅三藐三菩提時，為眾生說色不生不滅、不垢不淨，說受想行識不生不滅、不垢不淨；說十二處、十八界、四念處乃至八聖道分、四禪、四無量心、四無色定、五神通不生不滅、不垢不淨；說須陀洹果乃至阿羅漢果、辟支佛道不生不滅、不垢不淨；說佛十力乃至一切種智不生不滅、不垢不淨。

須菩提！是為菩薩摩訶薩為世間將導故發阿耨多羅三藐三菩提心。¹⁰²

【論】釋曰：

貳、菩薩能為難事、安隱世間等故，發無上菩提心

（壹）須菩提歎

須菩提發希有心白佛言：「諸菩薩未斷煩惱、大悲未具、未得阿鞞跋致，知諸法本性空而能發無上道心，是事甚難。」

（貳）佛述成，更讚餘因

一、佛述成

佛可其言：「如是！」

二、更讚餘希有因緣

（一）為安隱世間故

更讚菩薩希有因緣，所謂菩薩安穩¹⁰³世間故發心。

「安穩」者，能破一切煩惱，究竟不變失；譬如良藥能破病，不問甘苦，以能究竟除病、安穩*故。

佛能使眾生常安穩*，不期一世、二世。世間樂者，有法雖安穩而不樂，有法今世苦、後世樂。如服苦藥，腹中安穩、口中不美。是故說：「佛能與今世、後世樂。」

六道無常相故非安穩，是故說「出六道」名「安穩」。

¹⁰¹ [故發阿耨多羅三藐三菩提心] 十二字—【宋】【元】【明】【宮】，〔故〕—【聖】。（大正 25，558d，n.12）

¹⁰² 《大般若波羅蜜多經》卷 445〈50 初業品〉：「善現！云何菩薩摩訶薩為與世間作導師、將帥故，發趣無上正等菩提？善現！諸菩薩摩訶薩欲令趣向邪道有情離行四種不應行處，為說一道令歸正故，為雜染者得清淨故，為愁惱者得歡悅故，為憂苦者得喜樂故，為非理有情證如理法故，為流轉有情得般涅槃故，發趣無上正等菩提。善現！諸菩薩摩訶薩發趣無上正等菩提，欲為有情宣說開示色無生無滅、無染無淨，受、想、行、識無生無滅、無染無淨；……一切智無生無滅、無染無淨，道相智、一切相智無生無滅、無染無淨。善現！是為菩薩摩訶薩為與世間作導師、將帥故，發趣無上正等菩提。」（大正 7，246c17-247b14）

¹⁰³ 穩=隱【宮】下同。（大正 25，559d，n.2）

（二）為安樂世間故

世間樂，著因緣故，久後必生憂惱，不名為樂；涅槃樂，始終無變，故說離憂苦為樂。

（三）為救世間故

「救世間」者，如人為怨賊所逐，若親戚、若官力能救；眾生亦如是，惡罪諸煩惱因緣及魔民所逐，惟諸佛能說法救護。

（四）為世間歸故

「世間歸」者，如人遇暴風疾雨，必歸房舍；世間種種邪見煩惱等、身心內外苦惱老病死諸憂苦等，若歸¹⁰⁴佛，佛以種種因緣拔其憂（559b）悲苦惱。

（五）為世間依處故

「依處」者，一切有為法從和合因緣生故，無有自力、不可依止。眾生為苦所逼來依止佛，佛為說「無依止法」——無依止法者是真實，所謂「無餘涅槃」——色等五眾滅，更不相續；不相續即是不生不滅，不生不滅即是畢竟空、無依止處。

※ 因論生論：煩惱見故說「無依止」，清淨智慧說依止涅槃

問曰：若無依止處，何以說「依止」？

答曰：依止有二種：一者、以愛、見等諸煩惱依止有為法，二者、清淨智慧說依止涅槃。

煩惱見故，說「無依止」。¹⁰⁵

（六）為世間究竟道故

「究竟道」者，所謂諸法實相、畢竟空。

色等法，前際中無，後際中亦無；現在中，凡¹⁰⁶夫人憶想分別，業果報諸情力故有顛倒見；聖人以智慧眼觀之皆虛誑不實。如前、後，中亦爾——若無先後，云何有中！

能如是為眾生說法，則安處眾生於究竟第一道中。

（七）為世間洲故

「世間洲」者，如洲四邊無地，色等法亦如是，前、後皆不可得；中間，如究竟道中破。¹⁰⁷入前、後空故，中間亦空。

「水」者，三漏¹⁰⁸、四流¹⁰⁹諸煩惱及業果報中一切法。

¹⁰⁴ 歸+（依）【明】。（大正 25，559d，n.4）

¹⁰⁵ 「煩惱依止有為——煩惱見，說無依止」

二種依止「清淨智慧，依止涅槃——淨智慧，說依止——依止無依止。」

（印順法師，《大智度論筆記》〔B026〕p.163）

¹⁰⁶ （亦無）+凡【宋】【元】【明】【宮】。（大正 25，559d，n.6）

¹⁰⁷ 《正觀》（6），p.184：《大智度論》卷 71（大正 25，559b9-15）。

¹⁰⁸ （1）《雜阿含經》卷 31（896 經）：

如是我聞：一時，佛住舍衛國祇樹給孤獨園。爾時，世尊告諸比丘：「有三有漏。何等為三？謂欲有漏，有有漏，無明有漏。為斷此三有漏故，當求大師。」佛說此經已，諸比丘聞佛所說，歡喜奉行。（大正 2，225b1-6）

畢竟空、無所取，所謂「涅槃」，是為「洲」。

（八）為世間將導故

眾生沒在四流水中，佛以八正道船引著涅槃洲上。

如是種種因緣接度眾生名為「將導」。¹¹⁰

【經】

（九）為世間趣故

云何菩薩摩訶薩為世間趣故發阿耨多羅三藐三菩提心？

1、依三解脫門辨

須菩提！菩薩摩訶薩得阿耨多羅三藐三菩提時，為眾生說色趣空，說受、想、行、識趣空，乃至說一切種智趣空。為眾生說色非趣非不趣。何以故？是色空相，非趣非不趣。說受、想、行、識非趣非不趣。何以故？是受、想、行、識空相，非趣非不趣。乃至一切種智非趣非不趣。何以故？是一切種智空相，(559c) 非趣非不趣。如是，須菩提！菩薩摩訶薩為世間趣故發阿耨多羅三藐三菩提心。¹¹¹

何以故？一切法趣空，是趣不過。何以故？空中，趣、非¹¹²趣不可得故。

須菩提！一切法趣無相，是趣不過。何以故？無相中，趣、非趣不可得故。

須菩提！一切法趣無作，是趣不過。何以故？無作中，趣、非趣不可得故。¹¹³

(2) 另參見《集異門足論》卷 4 (大正 26, 383a4-9), 《品類足論》卷 6 (大正 26, 717b16-20), 《大智度論》卷 25 (1 序品) (大正 25, 243b27-28) 等。

¹⁰⁹ (1) 四流 + (等)【聖】【石】。(大正 25, 559d, n.7)

(2) 《雜阿含經》卷 43 (1172 經):「浚流者，譬四流——欲流、有流、見流、無明流。」(大正 2, 313c20-21)

(3) 另參見《集異門足論》卷 8 (大正 26, 399b29-c8), 《品類足論》卷 7 (大正 26, 719a26-b3) 等。

¹¹⁰ (1) 卷第七十一終，導 + (大智度經論卷第七十一)【石】。(大正 25, 559d, n.8)

(2) 卷第七十二首【石】，(摩訶般若波羅蜜品第五十一之余卷第七十二[臨-臣+馬]知品大如品) + 經【石】。(大正 25, 559d, n.9)

¹¹¹ 《大般若波羅蜜多經》卷 445 (50 初業品):「善現！云何菩薩摩訶薩為與世間作所趣故，發趣無上正等菩提？善現！諸菩薩摩訶薩希求無上正等菩提，修諸菩薩摩訶薩行，欲以四攝事攝一切有情，所謂布施、愛語、利行、同事。欲為有情宣說開示色以虛空為所趣，受、想、行、識亦以虛空為所趣，如是乃至一切智以虛空為所趣，道相智、一切相智亦以虛空為所趣。欲為有情宣說開示未來色趣空故無所從來，過去色趣空故無所至去，現在色趣空故亦無所住。……欲為有情宣說開示色非趣非不趣。何以故？以色性空，空中無趣無不趣故。受、想、行、識亦非趣非不趣。何以故？以受、想、行、識性空，空中無趣無不趣故。如是乃至一切智非趣非不趣。何以故？以一切智性空，空中無趣無不趣故。道相智、一切相智亦非趣非不趣。何以故？以道相智、一切相智性空，空中無趣無不趣故。善現！是為菩薩摩訶薩為與世間作所趣故，發趣無上正等菩提。」(大正 7, 247b14-c11)

¹¹² 非 = 不【宋】【元】【明】【宮】。(大正 25, 559d, n.13)

¹¹³ 《大般若波羅蜜多經》卷 446 (50 初業品):「所以者何？善現！一切法皆以空、無相、無願為趣，諸菩薩摩訶薩於如是趣不可超越。何以故？空、無相、無願中，趣與非趣不可得故。」(大正 7, 247c21-23)

2、依無起等辨

須菩提！一切法趣無起¹¹⁴，是趣不過。何以故？無起*中，趣、非趣不可得故。¹¹⁵
 須菩提！一切法趣無所有、不生不滅、不垢不淨，是趣不過。何以故？無所有、不生不滅、不垢不淨中，趣、非趣不可得故。

3、依夢等五喻辨

須菩提！一切法趣夢¹¹⁶，是趣不過。何以故？夢中，趣、非趣不可得故。
 須菩提！一切法趣幻、趣響¹¹⁷、趣影、趣化，是¹¹⁸趣不過。何以故？是化等中，趣、非趣不可得故。

4、依無量、無邊辨

須菩提！一切法趣無量、無邊，是趣不過。何以故？無量、無邊中，趣、非趣不可得故。

5、依不與不取等辨

須菩提！一切法趣不與不取，是趣不過。何以故？不與不取中，趣、非趣不可得故。
 須菩提！一切法趣不舉不下，是趣不過。何以故？不舉不下中，趣、非趣不可得故。
 須菩提！一切法趣不增不減，是趣不過。何以故？¹¹⁹無增無減中，趣、非趣不可得故。
 須菩提！一切法趣不來不去，是趣不過。何以故？不來不去中，趣、非趣不可得¹²⁰故。
 須菩提！一切法趣不入不出、不合不散、不著不斷，是趣不過。何以故？不著不斷中，趣、非趣不可得故。

6、依我見等辨

須菩提！一切法趣我、眾生、壽命、人、起、使起¹²¹、作、使作¹²²、知者、見者，¹²³是趣不過。何以故？我乃至知者、見者畢竟不可得，何況當¹²⁴有趣、非趣！

¹¹⁴ 起=趣【宋】【元】【明】【宮】，【聖】【石】*。(大正 25, 559d, n.14)

¹¹⁵ 《大般若波羅蜜多經》卷 446〈50 初業品〉：「善現！一切法皆以無起無作為趣，諸菩薩摩訶薩於如是趣不可超越。何以故？無起無作中，趣與非趣不可得故。」(大正 7, 247c23-26)

¹¹⁶ (如)+夢【宋】【元】【明】【宮】【聖】【石】。(大正 25, 559d, n.15)

¹¹⁷ 響=響【宋】【元】【明】【宮】。(大正 25, 559d, n.16)

¹¹⁸ (1)〔趣〕—【元】【明】【聖】【石】。(大正 25, 559d, n.17)

(2)《摩訶般若波羅蜜經》卷 15〈52 知識品〉：「須菩提！一切法趣幻、趣響、趣影、趣化，是趣不過。」(大正 8, 333a8-9)

(3)案：「是」前原有「趣」字，今依元本等校勘及前後文刪。

¹¹⁹ 〔不舉……故〕三十字—【宮】。(大正 25, 559d, n.18)

¹²⁰ 不可得=中無來無去【宮】【石】。(大正 25, 559d, n.21)

¹²¹ 起+(者)【宋】【元】【明】【宮】。(大正 25, 559d, n.22)

¹²² 作+(者)【宋】【元】【明】【宮】【聖】【石】。(大正 25, 559d, n.23)

¹²³ 「神我」異名的解說，參見《大智度論》卷 35〈3 習相應品〉(大正 25, 319b27-c14)，《瑜伽師地論》卷 95 (大正 30, 841a6-21)。

¹²⁴ 〔當〕—【宋】【元】【明】【宮】。(大正 25, 559d, n.24)

7、依四倒、四正辨

須菩提！一切法趣有¹²⁵常，是趣不過。何以故？常¹²⁶畢竟不可得，云何當有趣、非趣？須菩提！一切法趣樂、淨、我，是趣不過。何以故？樂、淨、我畢竟不可得，云何當有趣、非趣？

須菩提！一切法趣無常、苦、不淨、無我，是趣不過。何以故？無常、苦、不淨、無我畢竟不可得，云何當有趣、非趣？

8、依四惑事辨

須菩提！一切法趣欲事，是趣不過。何以故？欲事畢竟不可得，何況當有趣、非趣！

須菩提！一切法趣瞋事、癡事、見事，是趣不過。何以故？瞋事、癡事、見事畢竟不可得，何況當有趣、非趣！¹²⁷

9、依如等理境辨

須菩提！一切法趣如，是趣不過。何以故？如中無來無去故。

須菩提！一切法趣法性、實際、不可思議性，是趣不過。何以故？法性、實際、不可思議性中無來無去故。

須菩提！一切法趣平等，是趣不過。何以故？平等中，趣、非趣不可得故。

須菩提！一切法趣不動相，是趣不過。何以故？不動相中，趣、非趣不可得故。

10、依蘊、處、界辨

須菩提！一切法趣色，是趣不過。何以故？色畢竟不可得¹²⁸，云何當有趣、非趣？

須菩提！一切法趣受、想、行、識，是趣不過。何以故？受、想、行、識畢竟不可得，云何當有趣、非趣？十二處、十八界亦如是。

11、依六度辨

須菩提！一切法趣檀波羅蜜，是趣不過。何以故？檀畢竟不可得故，云何當有趣、非趣？

須菩提！一切法趣尸羅波羅蜜，是趣不過。何以故？尸羅畢竟不可得故，云何當有趣、非趣？

須菩提！一切法趣羼提波羅蜜，是趣不過。何以故？羼提畢竟不可得故，云何當有趣、非趣？

須菩提！一切法趣毘梨耶波羅蜜，是趣不過。何以故？毘梨耶畢竟不可得故，云何當有趣、非趣？（560b）

須菩提！一切法趣禪波羅蜜，是趣不過。何以故？禪畢竟不可得故，云何當有趣、非趣？須菩提！一切法趣般若波羅蜜，是趣不過。何以故？般若畢竟不可得故，云何當有趣、非趣？

¹²⁵ [有]－【明】【聖】。（大正 25，560d，n.1）

¹²⁶ （有）＋常【石】。（大正 25，560d，n.2）

¹²⁷ 《大般若波羅蜜多經》卷 446〈50 初業品〉：「善現！一切法皆以貪、瞋、癡事為趣，諸菩薩摩訶薩於如是趣不可超越。何以故？貪、瞋、癡事尚畢竟無所有不可得，況有趣非趣可得！善現！一切法皆以諸見趣為趣，諸菩薩摩訶薩於如是趣不可超越。何以故？諸見趣尚畢竟無所有不可得，況有趣非趣可得！」（大正 7，248b17-23）

¹²⁸ 得＋（故）【宋】【元】【明】【宮】【聖】。（大正 25，560d，n.3）

12、依十八空辨

須菩提！一切法趣內空，是趣不過。何以故？內空畢竟不可得故，云何當有趣、非趣？

須菩提！一切法趣外空，是趣不過。何以故？外空畢竟不可得故，云何當有趣、非趣？

須菩提！一切法趣內外空，是趣不過。何以故？內外空畢竟不可得故，云何當有趣、非趣？

乃至一切法趣無法有法空，是趣不過。何以故？無法有法空畢竟不可得故，云何當有趣、非趣？

13、依菩提分法辨

須菩提！一切法趣四念處乃至八聖道分，是趣不過。何以故？四念處乃至八聖道分畢竟不可得故，云何當有趣、非趣？

14、依佛功德辨

須菩提！一切法趣佛十力乃至一切種智，是趣不過。何以故？一切種智中，趣、非趣不可得故。

15、依三乘道果辨

須菩提！一切法趣須陀洹果、斯陀含果、阿那含果、阿羅漢果、辟支佛道，是趣不過。何以故？須陀洹果乃至辟支佛道中，趣、非趣不可得故。

須菩提！一切法趣阿耨多羅三藐三菩提，是趣不過。何以故？阿耨多羅三藐三菩提中，趣、非趣不可得故。

16、依三乘聖者辨

須菩提！一切法趣須陀洹乃至佛，是趣不過。何以故？須陀洹乃至佛中，趣、非趣不可得故。」

參、明信解義

(壹) 明能信解者之條件

須菩提白佛言：「世尊！是深般若波羅蜜誰能信解者？」

佛告須菩提：「有菩薩摩訶薩⁽¹⁾先於諸佛所久行六波羅蜜、⁽²⁾善根純¹²⁹熟、⁽³⁾供養無數百千萬億諸佛、⁽⁴⁾與善知識相隨，是輩人能信解深般若波羅蜜。」

(貳) 辨信解相

須菩提白佛言：「世尊！能信解是(560c)深般若波羅蜜者，有何等性、何等相、何等貌？」

佛言：「欲、瞋¹³⁰、癡斷離是性、相、貌，是菩薩摩訶薩則能信解深般若波羅蜜。」¹³¹

¹²⁹ 純=淳【聖】【石】。(大正 25, 560d, n.5)。

¹³⁰ 瞋=恚【聖】。(大正 25, 560d, n.8)

¹³¹ 《大般若波羅蜜多經》卷 446 (51 調伏貪等品)：

佛告善現：「若菩薩摩訶薩能於如是甚深般若波羅蜜多生於淨信及勝解者，心以調伏貪、瞋、

【論】

（九）為世間趣故

1、廣說「為世間趣故」之原因

問曰：上諸事中略說，今「趣」中何以廣說？

答曰：「趣」是¹³²總上九事¹³³之會歸，是故多說。

復次，「安樂」等及「趣」皆同一義，俱出眾生著涅槃故。若事事廣說則不可盡，「趣」最在後故廣說；當知餘者亦皆應廣說。

2、正明

（1）總說

「色等法趣空」者，如虛空但有名而無法；色等法亦爾，終歸於空。¹³⁴諸法究竟相必空故，餘者皆虛妄。

如人初雖有善言，久久乃知情實；色等諸法亦如是，入無餘涅槃時與虛空無異，當知先亦如是，但凡夫顛倒果報故見異。¹³⁵

一切法無有過出空等諸相，如人欲出過虛空不可得。

（2）別示

我等十六名皆因五眾和合假有此名，無有實法，云何當有趣、非趣？

若常、淨、樂、我等四顛倒破四聖行。如常等四法不可得，以顛倒故；色等諸法亦如是。

如常等不可得，無常等從常等出故亦不可得。是故說：「一切法趣常等、趣無常等。」

參、明信解義

（壹）明能信解者之條件

須菩提問佛：「是法甚深微細，誰當信解者？」

佛答說：「久行等因緣能信。」

（貳）辨信解相

更問：「久行等人有何等相？」

佛答：「是人離三毒心，亦不見是離，深入諸法實相故。」

癡及遠離貪、瞋、癡，為性、為相、為狀、為貌。復次，善現！是菩薩摩訶薩心以調伏貪、瞋、癡及無貪、瞋、癡，遠離貪、瞋、癡及無貪、瞋、癡，為性、為相、為狀、為貌。善現！若菩薩摩訶薩成就如是性、相、狀、貌，心乃於如是甚深般若波羅蜜多能生淨信及生勝解。」
（大正 7，249c24-250a3）

¹³² 是+（乃至品竟）【宋】【元】【明】【宮】【聖】【石】。（大正 25，560d，n.9）

¹³³ 《正觀》（6），p.184：《大智度論》卷 71〈52 善知識品〉（大正 25，558a21-26）所說的「1. 為安穩世間、2. 為安樂世間、3. 為救世間、4. 為世間歸、5. 為世間依處、6. 為世間洲、7. 為世間將導、8. 為世間究竟道、9. 為世間趣」等九事。

¹³⁴ 終歸於空。（印順法師，《大智度論筆記》〔E015〕p.311）

¹³⁵ 本空倒有。（印順法師，《大智度論筆記》〔E015〕p.311）

問曰：是人未得無生忍法，云何言「斷三毒」¹³⁶？

答曰：「斷」有二種¹³⁷：一者、根本斷，二者、薄少斷。¹³⁸

此中說「薄少斷」。

行者不分別是斷、是煩惱。何以故？煩惱相顛倒不定故，煩惱即是斷，是故言「離」¹³⁹。

〈釋趣一切¹⁴⁰智品第五十三〉¹⁴¹
(大正 25, 560c29-562b5)

(561a)【經】

肆、能信解般若者，趣至一切種智，應當驗知

(壹)能解般若故趣薩婆若果

一、明自行趣果

須菩提白佛言：「世尊！是諸菩薩摩訶薩解¹⁴²深般若波羅蜜者，當趣何所？」

佛告須菩提：「是菩薩摩訶薩解深般若波羅蜜者¹⁴³，當趣一切種智。」¹⁴⁴

二、明化他趣果

須菩提白佛言：「世尊！是菩薩摩訶薩能趣一切種智者，則¹⁴⁵為一切眾生所歸趣，修般若波羅蜜故。¹⁴⁶世尊！修般若波羅蜜即是修一切諸法。」

¹³⁶ 斷煩惱。(印順法師，《大智度論筆記》[E015] p.311)

¹³⁷ 根本斷。

二種斷煩惱—薄少斷——無生忍已前能得。(印順法師，《大智度論筆記》[B026] p.163)

¹³⁸ 另參見《大智度論》卷 27〈1 序品〉(大正 25, 262a6-16)。

¹³⁹ 離+ (釋五十一品竟)【聖】【石】。(大正 25, 560d, n.10)

¹⁴⁰ [一切]—【宋】【元】【明】【宮】。(大正 25, 560d, n.12)

¹⁴¹ (1) (大智度論釋趣一切智品第五十三)十四字= (摩訶般若波羅蜜驗知品第五十二)十四字【聖】，= (摩訶般若波羅蜜經品第五十二驗知品趣一切智)二十字【石】。(大正 25, 560d, n.11a)

(2) 三+ (經作趣一切智品)夾註【[宮>明]】，三+ (品)【宮】。(大正 25, 560d, n.13)

¹⁴² (能)+解【元】【明】。(大正 25, 561d, n.1)

¹⁴³ [者]—【元】【明】【宮】。(大正 25, 561d, n.2)

¹⁴⁴ 《大般若波羅蜜多經》卷 446〈51 調伏貪等品〉：

時，具壽善現白佛言：「世尊！若菩薩摩訶薩能於如是甚深般若波羅蜜多生於淨信及生勝解，是菩薩摩訶薩當何所趣？」

佛告善現：「是菩薩摩訶薩當趣一切智智。」(大正 7, 250a3-6)

¹⁴⁵ 則=是【宋】【元】【明】，[則]—【宮】。(大正 25, 561d, n.3)

¹⁴⁶ 《大般若波羅蜜多經》卷 446〈51 調伏貪等品〉：

具壽善現復白佛言：「世尊！若菩薩摩訶薩趣一切智智者，是菩薩摩訶薩能與一切有情為所歸趣。」(大正 7, 250a6-8)

三、明無所修、不受修、壞修是修般若

世尊！無所修是修般若波羅蜜，不受修、壞修是修般若波羅蜜。」¹⁴⁷

佛告須菩提：「何等法壞故，般若¹⁴⁸波羅蜜為壞修？」

「世尊！色壞故，般若波羅蜜為壞修；¹⁴⁹受、想、行、識、十二處、十八界壞故，般若波羅蜜為壞修；我乃至知者、見者壞故，般若波羅蜜為壞修；世尊！檀波羅蜜壞故，般若波羅蜜為壞修；乃至般若波羅蜜壞故，般若波羅蜜為壞修；內空乃至無法有法空、四念處乃至十八不共法、須陀洹果乃至一切種智壞故，般若波羅蜜為壞修。」

佛言：「如是！如是！須菩提！色壞故，般若波羅蜜為壞修；乃至一切種智壞故，般若波羅蜜為壞修。」¹⁵⁰

（貳）依五相¹⁵¹驗知信般若者

爾時，佛告須菩提：「是深般若波羅蜜中，阿鞞跋致菩薩摩訶薩應¹⁵²當驗知！

一、不著般若等

若菩薩摩訶薩是深般若波羅蜜中不著，當知是阿鞞跋致¹⁵³；¹⁵⁴禪波羅蜜乃至檀波羅蜜中不著，四念處乃至一切種智中不著，當知是阿鞞跋致。

【論】

肆、能信解般若者，趣至一切種智，應當驗知

（壹）能解般若故，趣薩婆若果

一、明自行趣果——釋問答意〔解深般若者，趣一切種智〕

問曰：般若波羅蜜非趣、非不趣，須菩提何以故問「行般若者趣至何處」？又佛何以答「趣薩婆若」？

答曰：外道言：「諸法從因趣果、從先世入今世、從今世趣後世。」

破是常顛倒故言「無『趣、不趣』」。

¹⁴⁷ 《大般若波羅蜜多經》卷 446〈51 調伏貪等品〉：

爾時，具壽善現白佛言：「世尊！如是般若波羅蜜多最為甚深，無能修者、無所修法、亦無修處、亦無由此而得修習。何以故？世尊！非此般若波羅蜜多甚深義中而有少分實法可得名能修者及所修法、若修習處、若由此修。

世尊！若修虛空，是修般若波羅蜜多；若修一切法，是修般若波羅蜜多；若修不實法，是修般若波羅蜜多；若修無所有，是修般若波羅蜜多；若修無攝受，是修般若波羅蜜多；若修除遣法，是修般若波羅蜜多。」（大正 7，250b15-24）

¹⁴⁸ （修）+般若【宋】【元】【明】【宮】。（大正 25，561d，n.5）

¹⁴⁹ 《大般若波羅蜜多經》卷 446〈51 調伏貪等品〉：

具壽善現白言：「世尊！修除遣色，是修般若波羅蜜多。」（大正 7，250b25-26）

¹⁵⁰ 另參見《大智度論》卷 86〈74 遍學品〉（大正 25，661a）以下。

¹⁵¹ 案：所謂「五相」者，指：（一）不著深般若〔等〕，（二）自證不由他，（三）不為諸惑牽，（四）常不離六度，（五）歡喜樂聞法。詳見此下經論所釋。

¹⁵² 〔應〕—【聖】。（大正 25，561d，n.6）

¹⁵³ 致+（相）【聖】【石】。（大正 25，561d，n.7）

¹⁵⁴ 《大般若波羅蜜多經》卷 446〈51 調伏貪等品〉：「復次，善現！應依如是甚深般若波羅蜜多觀察不退轉菩薩摩訶薩，若菩薩摩訶薩雖行般若波羅蜜多而無執著，當知是為不退轉菩薩摩訶薩。」（大正 7，251a1-4）

此中，須菩提以無著（561b）心問，佛以無著心答。

般若波羅蜜畢竟空，於諸法無障無礙；得無障無礙解脫故無障無礙。因果相似故，故¹⁵⁵言：「解深般若¹⁵⁶者，趣一切種智。」

二、明化他趣果

須菩提言：「菩薩知般若波羅蜜者為一切眾生所歸趣。」如子為苦惱所逼，則趣父母。

問曰：何以故但菩薩解深¹⁵⁷般若波羅蜜為眾生所歸趣？

答曰：菩薩於眾生中大悲心故，常修習般若波羅蜜。

以修故，能解一切諸法皆入般若波羅蜜，是故「修般若波羅蜜即修一切法」。

三、無所修、不受修、壞修是修般若

般若無定實法可得，故經中說「無所修是修般若波羅蜜」。

般若波羅蜜中，一切諸觀有過故不受，是名「不受修」。

「壞修」者，一切法無常散壞，故名「壞修」。

「可破壞法」者，所謂色等乃至一切種智。

佛可須菩提所說。

（貳）依五相驗知不退者

上品末¹⁵⁸說阿鞞跋致菩薩性、相、貌，¹⁵⁹今應驗試知。

一、不著深般若等

於深般若波羅蜜中著不？若著，則非；若不著，則是其相。

行般若波羅蜜菩薩有二種：一者、因般若波羅蜜觀一切法畢竟空，般若亦自空；

二者、不能觀般若亦空。¹⁶⁰

是故經中試知著不？

【經】

二、自證不由他

若阿鞞跋致菩薩摩訶薩行深般若波羅蜜時，不以他人語為堅要，亦不隨他教行。¹⁶¹

三、不為諸惑牽

阿鞞跋致菩薩摩訶薩不為欲心、瞋心、癡心所牽。

¹⁵⁵ [故] — 【宋】【元】【明】。(大正 25, 561d, n.8)

¹⁵⁶ 般若 + (波羅蜜)【聖】【石】。(大正 25, 561d, n.9)

¹⁵⁷ [深] — 【宋】【宮】。(大正 25, 561d, n.10)

¹⁵⁸ (1) 印順法師，《大智度論》(標點本)，p.2660 夾註：「『未』字應作『末』。」

(2) 《大正藏》及《高麗藏》皆作「未」(第 14 冊，1091c18)，今依文義及印順法師，《大智度論》(標點本) 改作「末」。

¹⁵⁹ 《正觀》(6)，pp.184-185：《大智度論》卷 71 〈52 善知識品〉(大正 25, 560b26-c3)。

¹⁶⁰ 「能觀諸法空，不觀般若空。」

二種行般若菩薩「觀諸法空，亦觀般若空。」(印順法師，《大智度論筆記》[B026]p.163)

¹⁶¹ 《大般若波羅蜜多經》卷 446 〈51 調伏貪等品〉：「復次，善現！諸有不退轉菩薩摩訶薩，行深般若波羅蜜多時，不觀他語及他教誡以為真要，非但信他而有所作。」(大正 7, 251a14-16)

四、常不離六度

若阿鞞跋致菩薩摩訶薩不遠離六波羅蜜。

五、歡喜樂深法

若阿鞞跋致菩薩摩訶薩聞說深般若波羅蜜時，心不驚、不沒、不怖、不畏、不悔，歡喜樂聞，受持、讀、誦、正憶念、如說行；須菩提！當知是菩薩先世已問¹⁶²是深般若波羅蜜中事已，受持、讀、誦、說、正憶念。

何以故？是菩薩摩訶薩（561c）有大威德故，聞是深般若波羅蜜，心不驚、不怖、不畏、不沒、不悔，歡喜樂聞，受持、讀、誦、正憶念。」

（參）明行般若

一、以空等相應，隨佛智心行

須菩提白佛言：「世尊！若菩薩摩訶薩聞深般若波羅蜜，不驚、不怖乃至正憶念，世尊！是菩薩摩訶薩云何行般若波羅蜜？」

佛言：「隨順一切種智心，是菩薩摩訶薩應如是行般若波羅蜜。」¹⁶³

「世尊！云何名隨順一切種智心，是菩薩摩訶薩應如是行般若波羅蜜？」

佛言：「以空隨順，是為菩薩摩訶薩行深般若波羅蜜；以無相、無作、無所有、不生不滅、不垢不淨隨順，是菩薩摩訶薩應如是行般若波羅蜜；以如夢、幻、炎、響¹⁶⁴、化隨順，是行般若波羅蜜。」¹⁶⁵

二、順畢竟空心，不觀一切法

須菩提白佛言：「佛說以空隨順乃至如夢如幻隨順，是行般若波羅蜜。世尊！是菩薩摩訶薩行¹⁶⁶何法——若色，若受、想、行、識乃至一切種智？」

佛告須菩提：「菩薩摩訶薩不行色，不行受、想、行、識，乃至不行一切種智。何以故？是菩薩摩訶薩行¹⁶⁷處，⁽¹⁾無作法、⁽²⁾無壞法、⁽³⁾無所從來、⁽⁴⁾亦無所去、⁽⁵⁾無住處，是法⁽⁶⁾不可數、⁽⁷⁾無有量；若無數、無量，⁽⁸⁾是法不可得——不可以色得，乃至不可以一切種智得。

¹⁶² 問=聞【宋】【元】【明】【宮】【聖】。（大正 25，561d，n.13）

¹⁶³ 《大般若波羅蜜多經》卷 446〈51 調伏貪等品〉：

佛告善現：「是菩薩摩訶薩相續隨順趣向臨入一切智智，應作如是行深般若波羅蜜多。」（大正 7，251b10-11）

¹⁶⁴ 響=響【元】【明】。（大正 25，561d，n.14）

¹⁶⁵ 《大般若波羅蜜多經》卷 446〈51 調伏貪等品〉：

佛告善現：「若菩薩摩訶薩相續隨順趣向臨入空、無相、無願、虛空、無所有、無生、無滅、無染、無淨、真如、法界、法性、不虛妄性、不變異性、平等性、離生性、法定、法住、實際、虛空界、不思議界、無造無作、如幻、如夢、如響、如像、如光影、如陽焰、如變化事、如尋香城，行深般若波羅蜜多，是為菩薩摩訶薩相續隨順趣向臨入一切智智，行深般若波羅蜜多。」（大正 7，251b14-21）

¹⁶⁶ 行=觀【聖】。（大正 25，561d，n.15）

¹⁶⁷ （無）+行【宋】【聖】【石】。（大正 25，561d，n.17）

何以故？色即是薩婆若，乃至一切種智即是薩婆若。色如相乃至一切種智如相皆是一如，無二無別。」¹⁶⁸

【論】釋曰：

二、自證不由他

阿鞞跋致菩薩所說¹⁶⁹事，於他語言中不生念：「是有實、不實。」

何以故？他人有二種：在家人，著五欲樂，虛誑不淨；出家外道，著諸邪見不實——此等所說皆無實事，是故不信。自得諸法實相故，乃至佛身來說破諸法實相者亦不信；得無為法故，心則安（562a）重，不復移轉。

三、不為諸惑牽

是菩薩雖未得佛道，貪欲等諸煩惱折薄故，不為所牽。¹⁷⁰

四、常不離六度

心常不離六波羅蜜——知善法果報味故，心常愛樂，不離六波羅蜜。

五、歡喜樂深法

如是等種種因緣故，聞深般若不怖、不畏，歡喜欲聞，讀、誦、問義、修習。

如雷霆，小鳥則怖畏悶死；孔雀大鳥歡喜舞戲。般若波羅蜜亦如是，邪見凡夫聞則恐怖；阿鞞跋致菩薩聞則歡喜，心無厭足，是故說「歡喜樂聞」。

是中佛說因緣：「是菩薩於過去世已聞深般若波羅蜜，多集諸福德、智慧故有大威德，有大威德故不怖畏。」

（參）明行般若

一、隨順一切種智〔畢竟空〕心行

須菩提問：「是菩薩聞深般若波羅蜜雖不怖畏，是般若無定相，云何應行？」

佛言：「隨順一切種智心。」

¹⁶⁸ 《大般若波羅蜜多經》卷 446〈51 調伏貪等品〉：

佛告善現：「是菩薩摩訶薩行深般若波羅蜜多時，不行色，不行受、想、行、識，如是乃至不行一切智，不行道相智、一切相智。何以故？是菩薩摩訶薩所隨順趣向臨入一切智智，無能作者、無能壞者、無所從來、無所至去、亦無所住、無方無域、無數無量、無往無來，既無數量往來可得，亦無能證。

善現！如是一切智智，不可以色證，不可以受、想、行、識證，如是乃至不可以一切智證，不可以道相智、一切相智證。

何以故？色即是一切智智性，受、想、行、識即是一切智智性，如是乃至一切智即是一切智智性，道相智、一切相智即是一切智智性。

何以故？若色真如，若一切智智真如，若一切法真如，皆一真如無二無別；若受、想、行、識真如，若一切智智真如，若一切法真如，皆一真如無二無別。如是乃至若一切智真如，若一切智智真如，若一切法真如，皆一真如無二無別；若道相智、一切相智真如，若一切智智真如，若一切法真如，皆一真如無二無別。是故，一切智智不可以色證，不可以受、想、行、識證，如是乃至不可以一切智證，不可以道相智、一切相智證。」（大正 7，251b28-c21）

¹⁶⁹ 說=試【宋】【元】【明】，=誠【聖】【石】。（大正 25，561d，n.21）

¹⁷⁰（1）斷煩惱：不斷。（印順法師，《大智度論筆記》〔E015〕p.311）

（2）不退，煩惱薄。（印順法師，《大智度論筆記》〔E021〕p.319）

問曰：是菩薩未得一切種智，云何能順？

答曰：是故說：「隨¹⁷¹順畢竟空心則順一切種智心。」¹⁷²

一切種智是寂滅相，¹⁷³佛後品中說：「一切寂滅相是一切種智。」¹⁷⁴

是故言：「順畢竟空則順一切種智。」

無相、無作、虛空、無生無滅、無垢無淨、如夢等亦如是。

二、順畢竟空心，不觀一切法

（一）順畢竟空心，無作法、無壞法，乃至不可以色等諸法得證

爾時，須菩提問：「順畢竟空心，觀何等法？」

佛答：「不觀色乃至一切種智。」

何以故？智慧欲求實事，色等有為作法皆虛妄，一切種智是實法。¹⁷⁵實法故，過有為法；¹⁷⁶過有為法故，說是法——

(1) 「無作」，無作者。

(2) 「無壞法」，無壞者。

(3) 是法不從六波羅蜜來，故言「無所從來」。

(4) 不入佛法中，故言「無所去」。

(5) 有為，虛誑故「不住」；無為法中，無憶想分別故亦「不住」。

(6)(7) 五眾和合故有六道數，壞五眾相續故則「無數、無量」。

(8) 無數、無量故則語言道斷，語言道斷故不可以行色等諸法得。

（二）釋因由：諸法一如，無二無別

佛此（562b）中自說因緣：「色等諸法即是薩婆若，薩婆若即是色等諸法。何以故？色等諸法如即是薩婆若如，薩婆若如即是色等諸法如，以是故說如¹⁷⁷，是如無二無別¹⁷⁸。」

¹⁷¹ 〔隨〕—【宋】【元】【明】【宮】。（大正 25，562d，n.3）

¹⁷² 般若與一切種智：順畢竟空即順一切種智心。（印順法師，《大智度論筆記》〔E011〕p.306）

¹⁷³ 一切種智：是寂滅相。（印順法師，《大智度論筆記》〔B026〕p.308）

¹⁷⁴ 《正觀》（6），p.185：參見《摩訶般若波羅蜜經》卷 21〈70 三慧品〉（大正 8，375c22-23），《放光般若經》卷 16〈70 漚愆品〉（大正 8，114a25-27）。

¹⁷⁵ 無上菩提：諸法中實。（印順法師，《大智度論筆記》〔E001〕p.285）

¹⁷⁶ 一切種智：實法；過有為。（印順法師，《大智度論筆記》〔B026〕p.308）

¹⁷⁷ 〔如〕—【宋】【元】【明】【聖】【石】。（大正 25，562d，n.7）

¹⁷⁸ （1）別+（釋第五十二品竟）夾註【聖】，別+（釋第五十二品竟）夾註【石】。（大正 25，562d，n.8）

（2）不分卷【石】。（大正 25，562d，n.9）